

MEZI AMWA LICWE

AFUMANWA NAKO KAUFELA



Lu itumezi kakusasana cwana ka Kubateni kwa Mulena Mulimu, ya kalile lisebelezo za kakusasana ka kulufa liñusa, kuli—kuli lukone ku “teeleza, lube ka likute” fapila Hae, kuli Una ni sa bata kuambola ku luna. Ni sepa hande kuli Uka eza Sa sepisize. Yena kamita u buluka Linzwi la Hae. Mi kacwalo lu itumezi ka kuputehana hamoho, lunze lupila, ni kwa neku le la Kuyakuile kakusasana cwana, mane ni kukona kulapela Mulena hape, ni kuputehana hamoho ili luna kuli lu utwe ku Yena. Kona libaka le lu tahelanga hamoho, ki ka ona mulelo woo.

² Cwale, Ni lyanganisize nyana Muzwale Neville, ka sipundumukela, kacenu, bakeñisa tolo yeñwi ye Ni bile ni yona. Kuli . . . Ni lumela mwa . . . Na . . . mwa litolo. Ni lumela kuli Mulimu wa ambolanga ni batu ka litolo. Mi Ni bile ni tolo ye ipitezi luli, busihu bwa maloba. Kuti, Ne ni sweli kuzamaya kwa matuko a lilundu, kwa sibaka sa malundu kokuñwi, ne ni ya kuyoca kwa sibaka kone Ni swanela kuba ni—ni mulaleo waka. Mi Na lemuha kuli, ha Ni yo atumela kwa sibaka, neba sweli kuliza lipina, sikwata sa balizi ne si sweli kuliza lipina, ni ma violin, ni kukatulusa sicaba hane basweli kuca cwalo. Mi nekuna ni sesiñwi ka zona sene Ni si ka tabela, konakuli, Na to fitelela fela kuikele. Ki ha Ni katana yomuñwi ya na pahama lilundu. Mi Na talima, mi batu babañata ne ba taha cwalo kwa lilundu kwa sibaka sa kucela see. Kono Na ne ni ba siile fela, na sikuluhela kwa neku la silyo, kamba, neli kwa nzohoto.

³ Mi hakulata, kwatasi a njetumuko mwa libala, Ne ni bona tabernakele. Na utwa linzwi la yomuñwi, le lili, “U kopane ni Muzwale Branham fa makopanelo a nzila ya kuli-ni-kuli. Utaha ashetumuka lilundu leo. Mi u mu bulelele sa kuli-ni-kuli.” Mi se Ni akufela kufita fa manganandila ao.

⁴ Mi mutu yo ha to fita, neli Muzwale Neville inza tinile suti ya hae ye puswa, kubonahala fela inge mwa bonahalela ainezi fani kakusasana cwana. Mi sa li, “Muzwale Branham, haiba ukaba mwa tolopo,” ali, “ikaba nto ye—ye yende kuli utahe, kakuli Muzwale Hank . . .” Cwale, ye Ni ziba fela, Muzwale Hank, ki Muzwale Henry Carlson, lu mu bizanga kuli Hank. Ali, “Ukona kunahana zemaswe ha usike wa potela tabernakele sihulu ka kuziba kuli ukaba teni mwa tolopo, kamba mwa muleneñi mo fa mazazi nyana.” Na zuha.

⁵ Mi, ka seo, Na to ikutwa shutano cwalo. Ne ni sa lati kuyo punya ka nako ya shunda yani, konji ha Ni buzize Muzwale

Neville haiba una ni sesiñwi sa butokwa kakusasana cwana, sa keleke. Kacwalo nana ni makeke, sina kamita, ali, “Aku tahe utopot.” Kacwalo, se lutaha cwalo. Ne ni mu bizize maabani musihali, mi utile kakusasana cwana, ka sipundumukela ku luna kaufela.

⁶ Cwale Ni lumela kuli ikona kuba nto yende, pili, kuna ka mukwa fela wa—wa ku mi tatululela lika zeñwi. Na, mane, ni mutu ya ipitezi kwa batu babañata. Mi Ni ya ipitezi ni kuna muñi, hape. Kakuli, Ni lika kulatelela zamaiso ya Moya o Kenile, bukaufi fela mo Ni konela. Mi zeo li lueza kuba baba ipitezi, mwabona. Lu ezanga lika zakuli—zakuli luinganga fafasi ni kukomoka linako zeñwi, “Kiñi ha Ni ezize nto yecwalo? Kiñi ze Ni ezelize nto ye?” Mi ona foo ukona kunahana kuli uezize so no sa swaneli kueza. Kono haiba ukona fela kuba ka tibeledo, ni kuba ni tumelo, mi uziba hande kuli ki Mulimu ya ku etelezi kueza cwalo, uka fumana kuli li kabeleka fela hande ka swanelo. Mwabona? Mi linako zevata lufumananga ona cwalo. Mi Ni ziba kuli Muzwale Neville ufumani cwalo fateni, linako zeñata. Mi baeteleli ni batu ba moya ba ziba cwalo.

⁷ Se kubile linako zeñata mwa bupulo bwaka kuli . . . Kaniti, kuzwelela inge Ni sa li fela mushimani, Hani si ka utwa fateni zamaiso yakuli Ni lukela ku—ku kupila mwa Jeffersonville. Kamita ibile nzinzi mwa oli, kuna kulika kupila kwanu. Sibaka sa pili, moya wa kwanu ha u lumelela ni na. Nto yeñwi, kubonahala kuba kuhatelelwa kwa moya.

⁸ Haiba ukuta kwa muaho ni kutalima kokuñwi kwanu, haiba ne ku si ka sinyeha ka linako za muunda, kuna ni liñolo fa litaba zeo, lene Ni amuhezi, pili ha ni bizwa mwa bulumiwa, Na kala kufunduka. Mi Muzwale George DeArk ni Na . . .

⁹ Ni bomahe ba Muzwale Graham Snelling, Muzwale Hawkins yana ni sibaka sa mafula a limota mwa New Albany, ni batu babañata, ba ni katana fande a sibaka nyana sa sebelezo ya litapelo kwanu. Mi niheba kubulela kuli, ha ne Ne ni ka ina, ne ba ka lumeleza bana babona kwa tafule, ku—ku kuyaha tabernakele, kona kuli ne ba sa lukeli kushimbululwa mwa sibaka ni sibaka.

¹⁰ Ha ne Ni utwile za boma bani, lizoho basweli mwana mi leliñwi kwa lizoho la hae, abulela kuli na ka lumeleza bana ba hae kwa tafule, kuli ba kone kuyaha sibaka ko ba kona kuina ni kulapela, neli yenyinyani hahulu kuli ni yeme. Kacwalo Muzwale George ni Na lwa taha hamoho ni kuitakaleza kuli lu ka yaha tabernakele.

¹¹ Mi cwale tabernakele imano yahiwa, kamita ne i bonahala kuli . . . Kakusasana ha Ni neela tabernakele, pono ya taha, zeo mane liñozwi mwa licwe la mwa lulu mwani, mi Moya o Kenile wa li kuna, “Ye ha ki tabernakele ya hao.” Mwabona? Mi Na buza kone kuinzi tabernakele yaka, mi Ha to ni inisa fafasi mwatasi a

mbyumbyulu. Mi ki Hali, “Eza musebezi wa mubuleli,” ni zeñwi cwalo, sina hamu ziba. Ku ñozwi neba mwa libuka.

¹² Lika zeo kaufela kubeiwa hamoho. Mi zazi leliñwi hane Ni sweli kungwenjula lwanda mwa lapa kwani ko kupila Muzwale Wood cwale, mi makwenyana ka ba basali nebapila kwani ka nako yani; Na ina fa mapahamelo a kwa mulaho, ki mahatelo akale a samende, sene Ni yahezi makwenyana ka kwani. Mi bona neba inanga fa munyako wa keleke ka nako yani, ku i babalela. Mi ka kutwahala fela hande sina mutu ha na ka bulela, Linzwi la bulela kuna, lali, “Hanikoni ku kufuyola haibile fela uina mwa sibaka se. U swanela ku ikambusa kwa sicaba sa henu ni sibaka se.” Kihande, Na, sani sa ni utwisa fela butuku, mwendi sunda mutundi kamba kufitelela.

¹³ Katundamo, ka nako kaufela, Sesiñwi sa ni lemusa, “Zwa kwanu, zwa kwanu. Tutela kwa neku la wiko. Zwelapili kuya kwa wiko.” Kihande, Na...Sibile si ni katazanga. Mi kubonahala kuli nako kaufela . . .

¹⁴ Cwale, Ne ni si otoilozi hande mwa munahano waka kuli sunda ye Ne lukela kufufela kwa Tucson, kone Ni lukela kulifelanga ndu mwa kuina, nibe kwani nako ya maliha ye; kuli bana bayange kwa sikolo, kukalisa ka kweli ya Mwimunene. Na yo fumana sibaka. Mane nekuna ni sibaka sene ni filwe kwani. Kono kuna ni sesiñwi sakuli . . .Mi—mi haiba Ni ya . . .

¹⁵ Nto yeñwi ye Ni tabela kubulela. Lu si ka yaha fela ndu ye fahalimu fa, ya mukutazi, fo iinzi cwale, Ne ni sa lati kuyaha kwani. Bomahe musala ka ne sa supezi luli. Mi mane nasweli kulila katata ka zona, mi ali, “Hanikoni fela kusiya boma kwanu, inge ni ziba kuli se ba supezi, mi hakuna yakona kuba babalela.” Kihande, Na utwisisa sani. Na utwisisa. Bani kona bomahe, mi kona bomahe fela baba nani, kamba ba ka ba nibona fateni. Kacwalo, Na utwisisa cwalo. Kacwalo Na—Na lapela ku Mulena, Na li, “Mulena, bakeñisa kuli ha Ni lati sibaka sani,” Na li, “ni konise kuutwisisa. Ni kaya kaufela ko Ubata kuli ni ye. Kono ha Ni ku filikanya musala ka, kuli ni muzwise kwanu aye kusili, mwa naha ya kwahule ko kusiba ya zibana ni yena. Mi na ha Ni mutu yasa ini fa lapa nako kaufela, mane. Ni konise fela ku ikutwa hande ona kwanu hamoho ni yena.”

¹⁶ Mi cwale, bomahe ha se ba ngilwe, mi baile kwa Kanya, ki yeo hape kapelezo yataha hape, mwabona, cwale ya ku funduka. Ha ni sa ziba sa kueza.

¹⁷ Mi cwale zazi leo fani tuto yene ba kalile mizwale ye imano kalisa kuhasana, Ne ni yemi fa katala nako yefelile hane Ni li kwanu na mi bulelela kuli Hanina kuba mwa simu ibile fela zeo li sa ezahala. Kacwalo, mizwale ba otoloji seo handende. Li utwahalile kaufela. Mwahala liholo ze twenti-foo, ne se li hasani kai ni kai.

18 Cwale seo si kwaluha simu hape ku na. Ha zibi sa kueza. Ha ni sa ziba kwa kuya. Ni kupile Mulena kunifa pono. Ni Mu kupile kuli ani bulelele sa kueza. Kono U ni tuhezi fela kuina.

19 Cwale, maabani busihu ha Ni yo isa bana kaufela kusili, musala ka ni babñwi, kuzwa kwa ndu, Na fa buitamo ku Mulena Mulimu. Mi Na bulelela ku Mulena Mulimu, “Haiba U ni fuyola mwa musipili mo Ni ya, Ni ka Ku sebeleza. Kono Una ni kubonisa kwa kuya, ni mwa ku yela, ni sa kueza.” Kacwalo, Na ipa ili na ku Mulena. Hamoho ni—ni bulumiwa ni lika kaufela, Na li beya ku Mulena. Mi se Nili, “Kaufela Ko ka kwalula, kaufela So kaeza, Ni ka zamaya mwa nzila ona yeo. Kufitela U eza nzila, Ni ka zwelapili fela mo Ni inezi konji U lukisa nzila.” Mi Na Mu kupa kuli a i lukise ibonahale hande kuli Ni si ke na pumiwa he, kakuli Ni lumela kaniti kuli lu fa manganandila a se si lukela kuezahala.

20 Ni si utwile ha si polofitwa kakusasana mo ka Muzwale Neville, kamba ku ibulelela fone Ni ziba kuli nekuna ni—nekuna ni bupolofita bwa na tamahanya teni. Cwale, kabakaleo, Ni mi lapelezi kaufela mina, mi Ni tokwa kuli kaufela mina mu ni lapelele kwateni, kuli Moya o Kenile u ni ise handende ko Nio swanela kuya, se Ni lukela kueza, kuli Ni si ke naeza mafosisa.

21 Mwa bona, linako zeñata, sicaba sinahana kuli mpo ya kupolofita, kuli Mulimu abulelele fela kuli “Ni ka kutisa *kwanu*, ni kuku inisa fafasi *fa*. Cwale zamaya fela *kafani*.” Mi Ha ku buleleli litaba zeo kaufela. Ha Na ka kubulelela, cwale ki tumelo yecwani ya kukoma yo no kaba ni yona? Mwabona? Mwabona, wena, U ka kutuhela wali kuyema unosi kufita mutu ufi kaufela. Mwabona? Mina kaufela mwakona kutaha kuna ku to ni kupa lika zeñwi, mi Ha si ka palelwa fateni kono Uka kufa kalabo. Yeo ki niti. Eehe. Kono Nakona ku Mu kupa lika za ka, mi linako zeñata Uka ni siya fela ni nosi, mwabona, ku ni siya fela mi nikene kuzona.

22 Ni na ni lika cwale ze Ni lukela ku iponela ninosi, ni buiketelo no Ni lukela kueza. Mi ye ki ya butokwa luli, kufitela mane Ni palelwa kukwanisa konji Ni ziba kuli ki Yena ya ambola ku na. Mi Na—Na . . . Ha na ku ni fa pono. U ni tuhela fela ona cwalo. Kacwalo Ni inzi fela inge ndiyala, cwalo, kakusasana cwana, Ha—Ha ni zibi nzila ya kuya. Kacwalo, Ni li beile ku Mulena.

23 Na—Na ikutwa kuli, ka kulola cwalo, Ni lukela kukuta kwanu kwa tabernakele ni kutusa Muzwale Neville kufitela sesiñwi fela ha si ezahala mwa musipili. Kacwalo, Ni kaba teni hamoho.

24 Ni buzize Muzwale Neville mizuzu nyana yefitile kuli, “Keleke ne izamaya cwani?”

Mi ki hali, “Hande.”

25 Mi kacwalo Ni utwa kuli mu sa na ni limpo za moya ni lika zeñwi mwahala mina, zesweli kubeleka, limpo za bupolofita, mi—mi ni kubulela ka malimi, ni kutoloka kwa malimi, ze lu sa zo utwa fela fa nako nyana. Mane lika zeo za hulisa keleke, mane mwa butuna.

26 Kono Na hupula kuli, mwendi busihu boo Na kona, haiba Muzwale Neville. . . Haiba Moya o Kenile ha u luisi kwa taba yeñwi yeshutani, busihu bo Ni ka tabela kuba ni. . . Mina kaufela, musika zwa kale kakusasana cwana, muñole puzo ni ku ibeya fa, lipuzo zeñwi mwa minahano yamina, kuli luzibe se i nahana keleke. Cwalo kona balisana mo ba zibelanga ze li mwa lipilu za sicaba. Mi kaufela mina mu na ni puzo, muñole ni kuibeya ona fa. Haiba hauna kaemba ka pampili ka—ka ku ñolela fateni kakusasana cwana, kipeto uñole busihu, kapili. Kacwalo, Ni ka tabela kuba ni nako yeñata mo Ni konela, ku zona, ku li talimisisa mi ka Mañolo ni kone ku mi alaba.

27 Mi haiba Mulena alata, haiba ki tato ya Mulimu; Ne ni bulezi pulelo yeñwi kwanu ha ki hale hahulu, kuli Ni katabela kubulela kumina fa Maswayo a sebene a mafelelezo a. . . mwa Sinulo. Cwale haiba luka. . . Hanina kukona kufita mwa Maswayo ao kaufela muno mwaha, kakuli ki kukalela mwa kauhanyo ya 6 ya Sinulo, kuyopunya mwa—kuyopunya mwa kauhanyo ya 19, kuli lufeze Maswayo ao. Kono amalalu kamba amane apili aona akona kualabiwa mwa busihu bulibuñwi fela, Na sepa, Liswayo ni liswayo libe busihu bwateni.

28 Cwale, haiba lu utwisisa, lubone fo ne lu yemezi mwa Buka yeo ka Sinulo, fani Keleke ha i ngelwa mwa Kanya, mi ze siyezi zateni liama Majuda, hakusana Keleke ni hanyinyani. Se li ama naha ya Sijuda. Kabakaleo lu nani kukutela mwa mulaho, kuzwa kwa Kuungelwa kwa Keleke, ni kunga. . . Lubona fa sene singile sibaka ka nako ya Maswayo ani, ni nako ya Keleke ya Bamacaba. Keleke fo se iile; mi fo ki naha ya Isilaele, ikuta kwa mulaho ni kutisa Isilaele kuzwa ka nako yene ile ni bona, kuto punya ka nako ya kacenu; ni Mesia ya taha, nako ye ba ka amuhela Mesia.

29 Cwale mwa musweli mwa utwa? Keleke i ingela mwahalimu. Mulimu na sebelisana pili ni Keleke, Masika a Likeleke. Lu litalimile zeo. Mi Keleke ya ngelwa mwahalimu kwa Kanya. Mi Moya o Kenile ukutela kwa Isilaele, kuba naha. Ni ku i tisa fafasi faa, nako yeo Mulalelo wa Sinawenga usweli kuezahala, mi ni ku Ba kutisa hape kwa mafelelezo a nako yani. Ni ka beya limati laka lelinsi fa, ni ku liswanisa hande ni ku li luta, foo nako ha itaha. Mi Mulena ukuta hamoho ni Munyaliwa, mi Isilaele wa mubona. Mi, oh, ha ki nako ni yeo mo ikabela!

30 Cwale, lusika tamahanya kale se mwatani, kuna ni tuto yetuna ye sitatalisa baituti ba za bulapelini babañata, ni baluti mwa linako za masika, ni sicaba sa Church of Christ ni bani ba ba ka to utwa taba yee, yeo ki yakuli, Lisunda Ze Sebente Za

Daniele. Luna ni . . . Halukoni kuzwelapili mwa Sinulo kufitela lutamahanya Munyaliwa ni Isilaele hamoho kwa Lisunda ze Sebente Za Daniele. Mi mwendi, haiba Mulimu alata, kuli haiba Akona ku bulela kuna kwapili, kuli ni ambole ku yeñwi ya Lisunda ze Sebente zee . . . kamba, isiñi Lisunda ze Sebente, kono Maswayo a supa a mafelelezo. Mi Sunda yetaha, Ni ka lika kunga Lisunda Ze Sebente Za Daniele, Sunda yetaha, haiba Mulena alata. Mi cwale seo si ka kwalula sibaka kanti, haiba Uka lu zamaisa, kuli lukale ka zeñwi. Kihande, lu ka ziba ka nako yeo ze ka tatama.

³¹ Muzwale Neville ni Na lu ka belekisana hamoho fa taba yee, ni kueza kaufela ze lukona kuli lutuse sicaba.

³² Cwale, lukana lu kutelanga kwa mulaho nako kaufela, lu lapelele bakuli, lukana luba baba tabile kueza cwalo. Mi mane Ni ka ezanga ona cwalo mwa mukopano kaufela, haiba batu ba kula, ki ku ba lapelela.

³³ Ha ni lakazi kuba ni litemuho zeñata. Mwabona ki se sene si ezahalile. Ni likile. Mi Ni ziba kuli Ni ezize mafosisa; koni Ni likile kupila fakaufi luli ni Mulimu, ka nako kaufela, ku Mulimu, kona lipono ze mo li ka ezahalela, mo li ka ezahalela. Neba sicaba se si kona kulatehisa lika, ni kuni biza, kuli ni yo lapela ku Mulena, kubuza ko ne li fumaneha. Inge Jesse ya na latehezwi ki limule, mi bashimani ba yo katana mupolofita, mi aba bulelela ze ne kuinzi limule mane za kuta kwa hae. Ni zeñwi cwalo, ze lukile handende. Kono liba hahulu zeñata, kacwalo batu babañata . . . Babasiyo fela mwa sibaka inge se; ki lifasi koliya-kolikuwa, mwabona. Kacwalo si fita fela, sa ni katalisanga fela, mi ni kukubeya kwa mafelelezo ka nako kaufela, kufitela sitaha fa sibaka sakuli . . .

³⁴ Mi seo kona sene si tiselize mizwale ku kalisa tuto, kuti Ne nili Mulena Jesu Krete mwa mubili. Mi luziba kuli zeo likona fela kusinya Bulumiwa kaufela kuba fela liembaemba, ni kufita linyefulo ku Krete ni lika kaufela. Mwabona? Kona ze ne Ni ba fezi kalimelo yetuna, kuli batuhele ona fani, ku ba zibisa kuli zani ne si za Mulimu, zani neli sa diabulosi. Mwabona? Mi bona ki batu babande. Mi za bonisa kuli batu bani ne ba pepilwe sinca ka Moya wa Mulimu, kakuli, haba bona Niti ka Mañolo, ba kutela ku Mulimu, enisha, mwabona, kapili. Kacwalo, zani za bonisa kuli neli Satani yana lika kueza sesiñwi kwa sicaba; kaufela bona neli ba bumulimu, sicaba sa Bakreste.

³⁵ Mi babañata babona ba ni bulelela kuli, “Muzwale Branham, luna ni sepo yetuna ku wena cwale kufita sapili.”

³⁶ Kakuli, mwabona seo, ni mpo ya ni file Mulimu, ne Ni ka eza sikamañi ni sani? Za yumbela naha kwa mahutu aka, kamba, sicaba. Se lubiza kuli *naha*, ha ki “kosmos” kwande kwani, ona—ona musili wa tobolo ni zeñwi cwalo. Ni talusa Bakreste, mulumeli wa niti, ani kona mafula a . . . Lu ambola za *naha*,

lu kutaza kaza “sicaba sesi pepilwe sinca,” kona ze lu biza kuli, naha. Isiñi fela mutu kaufela kwande kwanu, babatezi fela masila ni sileze se lupila mwa lifasi, leo fela—fela ki liluli la lifasi le lisweli kukutela. Ni ambola Bakreste babapepilwe sinca, sicaba sesili Bakreste ba niti.

³⁷ Ni libelezi muuna kuli ani tulele hape fa taba yeñwi. Yomuñwi natile kuna ha ki kale hahulu, mi ali, “Mulelo wateni luli, wa Krete kukwa mati fa mubu, ka mati a Hae, ni kueza sinkwa ni kulamba fa meto a mutu.” Ali, “Ha ki masila ni ao, ani neli masila, kuli Yena akwe mati, mati a Hae mwa mulomo wa Hae! Mo ne li bezi za busafa luli, kukwela fa mubu ni kubupa mubu wa sileze kulamba fa meto a mutu.”

Na li, “Kono a yo kuta inza bona.” Mwabona, kona cwalo.

³⁸ Mi yena muuna yaswana yani! Bakwaluzi sibaka sa babatinanga ze belela kwa sibaka saka kwani, mwa ziba, siliba mwa kutapa. Mi—mi muuna yani una ni tikiti ya bana ba hae kaufela kuli baye kwani ku yo tapa mwa siliba sani. Mi yena ni musala hae bayanga, ni bona, mwa siliba sani. Muni swalele, likezeli zaka. Kono basali bani mwa siliba sa kutapela sani, mwendi babakuma fa mwanda, kamba yemibeli, zazi ni zazi; basali, masila ani kaufela ni lika zeñwi, ni basali kacenu, ni kutapa cwalo mwa mezi ani, busafa bwani ni masila mwa milomo yabona, ni ku a miza ni kukwela fafasi. Ni bata fela kuli ani tulele, mwabona.

³⁹ Ba li, “Haiba—haiba Krete na ka pila kacenu, ne ba ka Mu fa mulatu ka kezo ya busafa bobucwalo.”

⁴⁰ Kucwani he ka *seo*? Na sepa mwa lemuha se Ni talusa. Ba kena ona mwa lisa lani, mi buñata bwa bona ni matuku a sihule, abo sifilisi, gonorea, ni zeñwi kaufela, ona mwateni mwani. Ni ku kukwela zona mwa mulomo, ni lika kaufela zecwalo, ni kutapwita mwateni ona cwalo. Mi kuti ani ki makete, eni sha?

⁴¹ Kacwalo, oh, mawi, lizazi lelupila kulona le, muzwale, kezeli! Seli nako ya Kutaha kwa Mulena! Mi Keleke ina ni sepo iliñwi, mi yeo ki Kutaha kwa Mulena.

⁴² Kihande, ha Ni koni kupaleliswa lika zeo; hakuna tuso. Bibe le se i bulezi kale kuli li kabateni zeo. Ha nikoni ku li tibela. Kono Ni bata linzwi laka ku yo utwahalela mwa Lihalimu, kuli Ne ni li lwanisa, nako ya i ka taha ya Katulo. Ne ni li lwanisa.

⁴³ Ni sa lumela kuli Bibe le ye ki Linzwi la Mulimu. Kipeto hakusana sika mwa lifasi, se si shutana ni Lona, se si kona ku Li paleliswa. Kono Bibe le ye fa, ye kiyona Niti, le ki Linzwi la Mulimu. Kacwalo he halu fuluheleñi fela ka—ka—ka lilabo zaluna ni ankora halunze lu yo fuwekela kwa Likamba la Pumulo. Mi—mi lwakona kufulula kamuso kuya kokuñwi, kono fa pili halu tiise ankora cwale ni kuteeleza kwa Linzwi la Ndata luna wa Lihalimu Hanza ambola ku luna ka Linzwi la Hae, lwa sepa, kacenu.

44 Mi busihu bo, cwale, mubone kuli muñole puzo kaufela ye mu nahana. Cwale, isiñi sika se si ka filikanya yomuñwi. Haiba u eza cwalo, kipeto zeo ki . . . Hanikoni kualaba yeo, ka kukala, mwabona. Kono wena, sesiñwi cwalo, sili, “Kihande, cwale, haiba Ni eza sa *kuli*, kikuli Mulimu uize lueze cwana?” Kamba, mwa ziba, lipuzo nyana mwa lipilu zamina. Kamba, “Luna ni limpo zebeleka ni luna, Muzwale Branham, mi kikuli lu li sebelise ka nzila *ye kamba yani?* Kamba, ki sikamañi seluna ni kueza?” Se Ni kona ku mi alaba ka Mañolo, mwa bona. Amuñole nto yeñwi yelikani. Ni ka taba. Mi haiba hakuna niheba yekana, kipeto Ni ka nga fela tuto isili cwalo, ni kukutaza ku mina busihu bo, haiba Mulena alata. Le ki la Sunda, mi Ni bile . . .

45 Sunda yefelile Ne ni kalile kuya ku Muzwale Cauble. Mi Na utwa mulangu wa keleke wo ulila, mi Na zwela fela mwa patelo. Ne ni palezwi kuitiisa. Ani neli mafelelezo. Ni mi utwile, kacwalo Na—Na—Na zwela fela kwanu.

46 Kacwalo cwale ha lu inamiseñi fela litho zaluna cwale ni kuambola ku Mubupi waluna, mi ibe ka linzwi la tapelo. Kuna ni yana ni kupo yeipitezi nji? Mu nanulr fela mazoho a mina, mu li, “Na . . .” Mu li zibise fela. Mulimu uziba ze li mwa lipilu zamina. Cwale mubuluke fela kupo ya mina mwa munahano.

47 Mulimu Yakenile Kufitisa, Ya bupile Mahalimu ni lifasi ka Linzwi la mulomo wa Hao, ka mihupulo ya mulelo wa Hao. Lu taha fa Pila Hao, ka Jesu Kreste, Mulena luna, ku to Kufa milumbeko ka Zo lu ezelize kaufela. Mi luitumezi hahulu ku Wena, Mulena, kakusasana cwana, ka kuziba fo lu yemi, ka kuziba sibaka seluli kusona kakusasana cwana, ni buino bwa nako, ni bukamusu bo bu sa taha. Ka kuziba kacenu, kuli ka sishemo sa Mulimu, kuli lu tapile mwa Mali a Kalvari, kuli lu itukise, ka tumelo mwa lipilu zaluna, ku to Mu katanyeza haiba Na ka taha kacenu. Lu swanela kubulela kuli, “Nihakuli cwalo, taha, Mulena Jesu.”

48 Mi lubona sibi hasinze si ekezeha, kufitela sibonahala inge kuli lifasi litantalika mwatasi a sibi. Kuli mane kunwa ni kulaula, ni linyawe, ni butanya, ni, O Mulimu, busafa, ni masila ni kusakena kwa sicaba. Ni ka mo bona, kambe ne ba ka lemuha fela, Mulena! kana sicaba sani, ba batinanga liapalo zecwalo zani zesina bulapeli zekama, ni kuzwela fande mwa mukwakwa, kana baziba kuli ha ba sesiñwi kwanda likokwani ni liluli, kuli mwendi mwa sunda yeñwi likokwani zakona kuca mubili wani oba sweli kumekela cwalo? Kikuli ba ziba kuli mabuku ni sishenyi li ka yo uca, mi moyo wabona ukaba kwahule kafoo mwa Kuyakuile kokusina Mulimu, kusina Kreste, kusina sepo, kutiba mwa maswabi amatuna, a ka to sinyiwa kufelelela ka fa Kutaha kwa Hae? O Mulimu, lufe manzwi a—a temuso, kuli lukone kulemusa moyo kaufela kuama kozi ye atumezi yee.

49 Ba ni luna kacenu. Lu fe “manzwi a butali,” sina Solomoni yana bulezi nako yeñwi ku Muekelesia, kuli lu be “bayahi baba butali,” kuli lukone kuba “balisana ba mutapi woo.” Mi lwa lapela, Mulena, kuli halu bata manzwi a kubulela cwalo, kuli ba kaba—ba be liemba za butokwa ze ka swala lipilu ze tokwile luli kakusasana cwana.

50 Ha lu si ka to kopanela mwatasi a situwa se si cisa se kacenu, ku to boniwa feela, kono lutile kwanu kakuli lwa Ku lata, mi kakuli lu lakaza ku utwa ku Wena. Wena u Mulati waluna, mi lu lakaza ku utwa Manzwi azwelela ku Wena. Lu itumezi ka ze lu utwile kale. Li ka inelela ni luna nako yetelele. Cwale lufe kabelo Yo lu bulukezi kacenu, halunze lu libelezi zeñwi ku Wena. Lu kupa ka Libizo la Jesu, ni kabakala Hae. Amen.

51 Cwale ki . . . [Kezeli ubulela mwa lulimi lusili. Muzwale u fa toloko—Mu.]

52 Lu itumezi ka lisusuwezo ze zwelela kwa Moya, li lu bulelela ni ku lulemusa kutokomela Manzwi ao mwendi Moya o Kenile uka bulela ku luna kacenu. Mi ha lu zibi fela Sa lu bulukezi, kono lu ziba kuli ku lukela kuba sesiñwi sa Ka lu tiseza. Mwendu kuna ni puzo mwa muhupulo wa hao, yeo Aka bulela zayona mwani. Wakona kuibulela mwa Liñusa kakusasana cwana. Wakona kuibulela busihu boo mwa sebelezo. Yena, fa nako yeñwi kacenu, U lika kuezwa cwalo, mo ku bonahalela, u lemusa mutu kuli alemuhe Manzwi.

53 Cwale ka kusikuluhela kwa Linzwi le liñozwi, ha lu apuleñi mwa Buka ya Exoda, kwa tuto ya Sikolo sa la Sunda.

54 Kana muna ni sebelezo ya kolobezo? [Muzwale Neville uli, “Batili, konji ka sikisi kiloko manzwibwana kacenu.”—Mu.] Batili. Sebelezo ya kolobezo ka sikisi musihali woo.

55 Halu yeni mwa kauhanyo ya 17 ya Exoda, ni kukalela fa—ka timana ya 5, Na sepa, litimana za 5 ni 6 mwa kauhanyo ya 17 ya Exoda.

Mi MULENA ali ku Mushe, Zwela kwapili a sicaba, hamoho ni babahulu ba sicaba sa Isilaele; usweli, mwa lizoho tupa ya hao, yo natisize nuka ka yona, mi u zamaye.

Bona, Ni ka yema fapila hao . . . kwani fa licwe la Horebe; mi . . . u ka nata licwe, mi mwezi a ka zwa ku lona, sicaba si nwe. Mi Mushe aeza cwalo babahulu ba Isilaele inze ba bona.

56 Cwale haiba Ni lukela kubiza palo nyana ye kuba tuto la Sikolo sa la Sunda, Ni tabela kunga ye kuba tuto ya kakusasana cwana, *Mezi Amwa Licwe Afumanwa Nako Kaufela*.

57 Lu ziba kuli Isilaele kamita ubile mutala wa keleke. Kakuli, Isilaele neli sicaba sa Mulimu kufitela ba zwa mwa Egepita, mi

kona baba keleke ya Mulimu kakuli neba kauhani ku babañwi ba lifasi.

⁵⁸ Mi ha lu kauhani ku babañwi ba lifasi, fohe kipeto lu ba keleke. Kono haibile fela lu sa zwakani ni babañwi ba lifasi, fo he kipeto haluyo mwa keleke. Cwale Ni sepa kuli seo sa nwela hande, si ka inelela mwa sibaka sateni. Mwabona, ha lu keleke konji ha se lu kauhani ni lifasi. Ku ikambusa, kuzwa mwa sicaba se si masila, kusina ku utwana ni bona, ni ku sa ikabela kwa libi zabona. Musike mwa kopana hamoho baba salumeli, kono mu kauhane kwa lika za lifasi.

⁵⁹ Mi Isilaele inge asali mwa Egepita, nebali sicaba sa Mulimu. Mi cwale ha ba bizezwa kwande, kamba baba ni mututo, kuzwela kwande, kona ba to bizwa keleke, kakuli neli fani ha ba ikambusa ku babañwi ba lifasi.

⁶⁰ Mi lona linzwi luli la kuli *keleke* litalusa “baba bizizwe.” *Exoda*, “ki kututa.” Mañi ni mañi waluna, sina Bakreste, lubile ni mututo mwa bupilo bwaluna. Neluna ni nako yene lu bizizwe kusiya balikani baluna, lwa bizizwa kuzwa mwa sicaba bo ne lu utwananga ni bona, mi lwa to ba sicaba sesi shutuni, kuzamaya ni sicaba se sishutani sa likezo ze shutani. Ne li mututo mwa bupilo bwaluna.

⁶¹ Ki mutala omunde luli o Isilaele a lufile, wa fani Mulimu ha ba biza. Neba bile ni mututo, mi ba zwa mwahala ba—ba batu ba lifasi, mi se baba naha ye kauhani, kutaha ku Mulimu, sicaba se si ipitezi. Ne ba zamaile mwa miluti ya sipula sa sishemo. Ba pila ni kuzamaya ni Siita sa Mulilo sesituna. Mi Mulimu a ba zwise mwa Egepita, kutaha kwa naha ya Na ba sepisize.

⁶² Mi, mwa mututo woo, ba fiwa muzamaisi wa moya, muzamaisi, yanali Mushe, mupolofita yomutuna ya tozizwe yanali mu—mu mutu yomutuna. Nali mutu wa bumulimu, na pepilwe ali mutu wa bumulimu. Mulimu amu biza kuzwa ku mahe, mane nako yani isika fita kale; Mulimu na mu supile kale kusikaba kale mutomo wa lifasi, kuli abe muzamaisi wa lusika lwani, kuli atise mututo wa hae kwa sicaba.

⁶³ Kwanu nako ya kale kwa mulaho, Ne ni ambozi kwa banana mo mwa tabernakele, mi nenina ni kutazo nyana ya bona; mi na bulela kamba kubonisa siswaniso sa mo Jocibedi, mwa na lapelezi, yena ni Amramu, ndatahe Mushe, ka kuezwa sika sene si lamulezi sicaba. Mi Amuramu abona pono ya Mulimu inza yemi, kamba Lingeloi, inge lisupile kwa mutulo, ni ku mu bulelela se si ka ezahala. Mi Mushe mbututu a pepwa. Mi ha ba si ka saba taelo ya mulena, kamba niheba kubembiwa. Ne ba ziba kuli Mulimu Una ni lizoho ku Mushe, mi ani neli mafelelezo. Ki niti. Hakuna taba ka sa na bulezi mulena, sene li bulezi lifasi la litaba za naha, sene si bulezwi ki lika kaufela, neba ziba kuli Mulimu na beile lizoho la Hae ku Mushe. Kacwalo ha ba si ka saba ku mu lukulula, lukena mwahala likwena; kanti neli fela mafula kai

ni kai a bana ba Maheberu, a ne ba fepisa likwena zani. Mi ibo Mushe abeiwa mwa areka nyana ni ku lumiwa mwahala likwena, mwahala zona luli. Kakuli, ne ba si ka saba sika, ba ziba kuli Mulimu na beile lizoho la Hae ku Mushe.

⁶⁴ Kihande, cwale, kambe neluna ni ku ziba fela yona taba yeswana yeo, kuli Muzamaisi waluna yomutuna, yena Moya o Kenile, Mulimu u Mu lumile. Mi ki Yena Mueteleli wa luna. Mi hakuna taba kamba lifasi libulela sikamañi, ni mo ba ka ku sehela, luna lu latelela Muzamaisi wa luna! Mulimu na lumile Moya o Kenile kuba Muzamaisi wa luna. Mwabona? “Fa nako nyana lifasi halina ku Ni bona. Kono mina muka Ni bona, kakuli Ni kaba ni mina, mane mwahala mina, kuisa nwa mafelelezo a lifasi.” Kacwalo, Muzamaisi waluna yomutuna uina ni luna, Moya o Kenile. Cwale lu swanela kulatelela Muzamaisi yoo ni kueza fela Sa bulela kuli lueze. Mi Muzamaisi yo hana ku lu zwisa mwa nzila, Uka lu beya hande mwa nzila ya Mañolo ka nako kaufela. Kono Hana kukeluhela kwa neku *leliñwi* ka sesiñwi, ni neku *le* ka sesiñwi. Uka ina fela hande mwa nzila ya Mañolo.

⁶⁵ Mi Mushe nana ni musebezi wa kuli ange Isilaele, ni kulatelela kuzwa fani kusila Liwate le Lifubelu, mane kusila Jordani, ku yo punya mwa naha ya sepiso, kufita mwa lihalaupa. Ne si Mushe ya na zwile mwa sikuka. Ne si Mulimu yana zwile mwa sikuka. Neli sicaba sene si zwile mwa nzila, ze ne tisize butata. Kacwalo, ha lu nahaneñi fa litaba ze cwale. (Mu niswalele.)

⁶⁶ Mushe, sina muzamaisi ya tozizwe. Mafelelezo, ha yo bonisa kwa sicaba, ka lisupo ni ze komokisa, zana kona fela kueza Mulimu, aea lisupo ze ni ze komokisa fapila babahulu ba Isilaele, ni fapila Isilaele, kufitela ba ikolwisisa kuli Mushe yoo neli yena mutoziwa yana lukela ku ba lukulula kuzwa mwa naha ye, kuliba naha yani yende ye ne ba sepisizwe. Mi ha ba to bona lika zetuna zana ezize Mushe ka libizo la Mulimu, ne ba itakaleza ku mu latelela. Mi a ba lukulula, ku ba isa ka nzila ya Liwate le Lifubelu, basilela mwabuse, fa mubu o omile, mi ni kukena mwa musipili wa lihalaupa, otalusa nako ya miliko.

⁶⁷ Mutu ha amuhela Krete kuba Mupulusi wa hae, lika kaufela liba fa nalela fa situwa sandu. Kono, mutu yo asika taha kale mwa kolobezo ya Moya o Kenile; mutu yo, ulukela kuba ni nako ya kukeniswa. U swanela kuba ni nako ya kulikiwa mwa bupilo bwa hae. Kaufela mina mubile ni yona. Nana ni nako ya kulikiwa ye. “Mwana kaufela ya taha ku Mulimu, u na ni kukalimelwa pili, kushapiwa, kunatiwa. Mi haiba lupalelwa ku itiisa mwa likalimelo, kipeto kubonisa kuli ha lu bana ba Mulimu; lu bana bamwa bucwani, mi isi bana ba Mulimu,” Bibeles ibulezi ona cwalo. Kono haiba lukona kuyemela kalimelo, ka kuziba kuli “lika kaufela libeleka hande kwa bunde ku baba lata Mulimu,” fohe kipeto lu bana ba bashimani ni basizana ba

Mulimu, kipeto U lu swaya ka Moya o Kenile kuisa lizazi la kuliululwa. Mwabona, koo kona kushapwa, kuhapelezwa, lika ze lufita kuzona.

Mi Isilaele, sina mufuta wa litaba za kale, nana ni kuamuhela kushapwa cwalo.

⁶⁸ Cwale, hane bali kwani kwa Egepita, mi Mulimu aluma Mushe. Ki ha otolola mulamu, mi minaŋi ni linda za taha kuzwa mwa mubu. A otololela lizoho kwa lizazi, mi la unsufala. A li otololela fa mezi, mi a fetuha mali. Kiŋi, Isilaele nali mwa Kanana . . . mwani mwa—mwa Gosheni, inge bana ni fela nako ya tabo; lizazi ne li si ka likela fateni, likoto ne li si ka ba potela; kiŋi, nebana ni fela nako ya tabo!

⁶⁹ Inge fela mo no ezelize nako yo piliswa. Lika kaufela, linyunywani ne li opela ka kushutana, mi maŋi ni maŋi na tabile. Mi, oh, mawi, lika kaufela mo ne libezi fela hande nako yo piliswa! Mi kwa taha nako ya muliko, kushapiwa, nako ya kukeniswa, kuikenisa ili wena kwa lika za lifasi, “kubeya kwatuko buima bo bu imela ka bunolo.” Wena, uli muuna, nona ni kutuhela kuzuba kwa hao, kutuhela kunwa kwa hao, tuhela kuyanga kwa kubapala pool, mikiti ya hao ya busihu kaufela. Lika zeo kaufela, no na ni kuikenisa ku zona, ka tumelo yeli mwa Mali a Jesu Kreste. Ikenise ili wena! Mina basali ne muna ni kutuhela milili yamina kuhula hande, kutina mandelezi amatelele, ni kueza ka kushutana kufita mo ne muinezi. Nako ya kukenisa! Linako zeŋata ne ba hanyeza ni kukuta kwa mulaho; kihande, yacwalo ha ki mwana Mulimu, mwabona. Mwana Mulimu u talima hande kwa Kalvari, mi uziba kuli ki kwa bunde bwa hae.

⁷⁰ Kacwalo he nako yateni yeo, fani kona fo kutaha kuwa kokutuna, Isilaele. Nako ye ya kuputehana hahulu, kona foo sicaba hasikala kuikaba, kuzwa neku le kuyane ku leliŋwi. Mi cwale mwa lingambolo zabona, “Kihande, kambe lu kutela kwa Egepita. Mioyo ya luna i nyikiswa ki sinkwa se.” Ka manzwi amaŋwi, haiba Ni kona kuinga ka buino bwa kale cwale, kona zene babulezi.

⁷¹ Cwale mwa lizazi la kacenu, ku kaba kuli, “Oh, la Bulalu ni labulalu busihu, mukopano wa litapelo! La sunda ni Sunda kakusasana, lukutela mwa keleke! Lu teezeza sikamaŋi? Kinto yeswana; mukutazi wa yema ni kukutaza; lipina; wa kuta kwa mulaho.” Mwabona, fohe kipeto muzamaya fela inge mulao wa musebezi. Ha u mulapeli. Mulapeli uya kwani ku yo lapela, ku yo itahisa fapila Mulimu, kulumba Mulimu ka bunde bwa Hae; kwa Linzwi kaufela, u ka kumalela ku Lona.

⁷² Kuswana fela sina kutwano ya lilato. Haiba u zamaya ni musizana kakuli uziba kuli ki musebezi, kamba uzamaya ni mushimani, ha no li mwanana. “Boma babata kuli ni zamaye ni mushimani yoo, kono Na hani mutabeli hande.” Hakuna zende

zo bona kuyena zetaha ku wena. Kamba, haia ki nzila yeswana ka za musizana kamba mushimani, kamba mushimanabi ku musizana. U zamaye ni yena, wa ku nyikiswa; bomabo babata kuli uzamaye ni yena kakuli kona mufuta wa musizana yo batabela bomaho. Mwabona, li ka ku nyikiswa; hakuna kutwano fo ka lilato. Kono hauna ku bilaela, hautabeli ku i kenisa, hauna kutabela ku mu bona. Mi ki kuli. . . Kiñi, kinto ye maswe. Mi ha taha ku to kubona, mawi, u lakaza fela a akufe kutaha, kuya kwa hae.

⁷³ Yeo ki nto yeswana foo wena, “Kiñi za kulatela nako yetelele hahulu cwalo? Kucwani ze kaufela, ni lika kamukana?” Mwabona, ha u yo mwa lilato.

⁷⁴ Kono ha uka inelela kwa Linzwi kaufela, mi Moya u kufile temuso kakusasana cwana, mwabona, “Ku kumalela kwa Linzwi kaufela.” Zeo likona kuba za Na sweli kuambola ku wena ka zona. Ku kumalela! Ki Bupilo Bobusafeli, Linzwi la Mulimu kaufela. Ki tabo ya kuya kwa keleke, mwatasi a buino kaufela. Kamba kwa cisa, kubate, kusa isezangana, kamba batu ba omana, kulwana, kaufela seo sili sona, i sa li tabo ku utwa Linzwi la Mulimu. Kipeto u mwa lilato ni Kreste, mwabona, u lata kuya kwa keleke.

⁷⁵ “Kihande, mulatiwa, ki la Sunda kakusasana hape, Ni sepa kuli luna ni kutapisa banana ni kuya kulo kwani. Mawi, zeo za nyikwisa!” Mwabona, ha u yo mwa lilato.

⁷⁶ Kono haiba u mwa lilato luli, ha ukoni fela kulibelega la Sunda kakusasana litahe, u swanela fela kuba ni bona kwani. Mi cwale ha luba, ni kusiya. . . Sicaba sa Mulimu, ha si ku katalisi. Kiñi, ki mi—ki mizwale ni likezeli. Sina hane Ni bulelenga kuli, “Mu kaba baba swalisani hande sina makunka a Mabele kakusasana ha kubatile.” Ha—ha ki sebezi, li swanisana fela hamoho, mwa ziba, ki kuswalana hamoho. Cwale, woo ki mubelelelo o sabisa, kono ki—ki—ki kulika ku mi bulelela se Ni talusa, mwa bona. Mu swalisane hamoho. Mi hakuya kubata cwalo, kona mo li ka tamahanela hamoho. Mi yeo kona nzila mo li lukela kuezahalela ni luna. Kubata kwa silami. . .

Balikani ba lifasi ha ba ku ketulula,
Niteñi u kumalele katata ku Yena.

⁷⁷ Mi se lu lata, mañi ni mañi, isiñi kuli lu bo mukete; kono ki Kreste ku mutu ni mutu, yo lu lata, mwa bona. Ki Mulimu yali mwa libupiwa zaluna, yo lu lata. Cwale lu lata kutaha hamoho. Ne lu opelanga pina ya kale kuli:

U fuyolwe muhala o tama
Lipilu zaluna mwa lilato la Bukreste;
Ki kopano ya mihupulo ye swana
Iswana sina yani ya kwa halimu.

Mwabona, ki kopano ya mihupulo yeswana sina yani yakwa Lihalimu.

Fapila lubona lwa Ndate,
 Lu sululela litapelo zaluna ka kuipa;
 Sabo ya luna, sepo za luna, ze lubata ki
 zeswana,
 Tabo ya luna ni lipilaelo za luna.

⁷⁸ Mwabona? Eeni, sha! Mutu ha bile ni mbuyoti, kaufela lu tabile ka zona. Mutu hana ni maswabi, lwa swaba ni yena. Luna, lubata kuli kaufela lube hamoho. Cwale luswanela kuba ona cwalo.

⁷⁹ Mi cwalo kona Isilaele mwa na lukela kubela. Kono ya to ba mutiyo, “Oh, sinkwa se si bubebe se, sinkwa sa Mangeloi! Kihande, kiñi ze lu bilaelela sikwa sa kale se? Mioyo ya luna i nyikiswa ki sico se! Mi lika kaufela za fosahala. Mi—mi musali muhulu yoo ya wa busihu ni busihu, kupalañi, kihande luicele kwateni garlik ni nyanisi ya mwa Egepita.” Mwa bona, lipilu zabona ne li si ka itukisa mwa musipili.

⁸⁰ Mi muuna kamba musali ukala kubilaela ka za kuya kwa keleke, ba katala hahulu kuya kwa keleke, ha ba si ka itukisa mwa musipili. Yeo ki niti. Kuna ni se si fosahalile kokuñwi.

⁸¹ Oh, ha u lata Mulimu, ni kunahana kuli u ya kwa Lihalimu, mi kaufela mina mwa zamaelela hamoho!

Ha ki bulikani kwabunde, ni tabo ye pahami,
 Kuyendamena fa Lizoho la kamita;
 Oh, ha ki kozo kwabunde ni Mulena ka fakaufi,
 Kuyendamena fa Lizoho la Hae la kamita.

Ha ki . . . Lwa opelanga lipina zeo.

Lu ikabela bumai bwaluna hamoho,
 Ni kulwala mitiyo yaluna;
 Ni kupotelana hande hañata
 Iba miyoko ya makeke.

Ha lu kauhana kusiyana,
 Si utwisa lipilu butuku;
 Kono luka swalisana hamoho mwa lipilu,
 Ni kusepa kubonana hape kwa mukopano
 otatama wa litapelo. (Eeni, sha, lu sa
 swalisani mwa lipilu!)

⁸² Cwale mu itukiselize musipili, mwabona, mu itukiselize kuya kwa Naha ya sepiso. Linako za miliko, sani kona sibaka ba kozi; sa mwa lihalaupa, linako za miliko.

⁸³ Isilaele, mwa nako ya hae ya muliko, na kalile kubilaela ni kuomana mwahala bona, ni kunyikwa sinkwa. Mi ne ba bata kukuta kwa Egepita.

⁸⁴ Mi cwale ba kala kubilaela ka muzamaisi wabona. Oh, ne ba saba kuli na ba isa kusili; kasamulaho amano i ponisa kuli nali muzamaisi, mi Mulimu apaka kuli nali muzamaisi. “Kihande, mwendi luezize ka kufiteleza nyana mwa tumelo. Mi—

mi mwendi lu keluhile, kaufela lu mwa mitala ye fosahalile,” kamba, nto yeñwi ye cwalo, mwabona, nebasweli kuambola kulwanisa Mulimu kulwanisa Mushe, Mulimu ni muzamaisi wa Hae.

⁸⁵ Cwale ha lu fita fa sibaka, sakuli, “Ha ni zibi haiba Linzwi litalusa Se, kamba kutokwa,” mi, “Ha ni zibi ka za Moya o Kenile; Ni ya sa zibi hande ka Zeo. Na ziba babañwi baba saezi cwalo.” Kihande, amu zwelepili kuya kwa Egepita. Mwabona?

⁸⁶ Kono haiba luli u tamehile kuina hande mwa nzila, pila hande ni Muzamaisi yoo, yena Moya o Kenile, pila hande ni Linzwi. Mi haiba u ina hande ni Moya, Uka ku buluka mwa Linzwi. Yeo ki niti. U ka ku zamaisa hande mwa nzila, nzila ya Linzwi. Mi usike wa U saba. Hauna ku ku holofaza, Uka ku tusa fela haiba u holofezi. U ka folisa likolofalo kaufela, Moya o Kenile uka eza cwalo.

⁸⁷ Cwale lu fumana cwana kuli, mwa musipili wo, ha se ba bile cwana, bataha mwa sibaka sa Horebe. Mi H-o-r-e-b-e, Horebe, lufumana cwana. . . Ha lu abeni linzwi leo hande. Kwani kona koo—koo *Horebe* italusa “sibaka se si omile” kamba “lihalaupa.”

⁸⁸ Ha luzwa mwa kopano ni yomuñwi mwa keleke, ni kuzwa mwa kopano ni Moya o Kenile, si lu tisa mwa sibaka, sa lihalaupa, hakuna zepila kulona, kaufela lina ni miutwa. Mwabona, ki—ki lihalaupa, sibaka nyana sa mikakani ni bulimbwe fela. Kana mwa ziba kuli zani ki likamañi? Lani ki litali lelinde lelinyinyani leli bunolo le li sina mezi, litatani fela kufitela liba le li shengile mi la taba. Mi ha u bona mutu ya cwalo, mwendi ki moyo omunde o no lukela ku selaelwa hande ka mezi, o no kaba litali nyana lelibunolo kamba nto yeñwi. Kono kufita kube cwalo, u itatelize kufitela uba muutwa, ni ku tabaka fela lika kaufela, mwa ziba, kufumana fela milatu kubabañwi. Se si tokwahala fela ki mezi. Ku felile. Ona fela u tokwa a— a ancafazo, kamba ku ikaba, kuncaafazwa kuzwa ku Mulena. Uka—uka tatuluha mo uinezi cwalo, haiba mu ka ubeya fela mwa mezi.

⁸⁹ Kono, kwani kona ko kupila bona mwa sibaka sani balukela kunyanda ni buino bwa sibaka sani. Mi bani baba lakaza kupila mwa buino bwa mufuta wani, ko kuna ni lika kaufela inge li nataka ni kuomana, ni kuomana ni likañi ona cwalo, kihande, mu ka pila fela mwatasi a buino bo bucwalo, kihona. Kono ha lu lukeli kupila mwani, ha ki swanelo kuli lupile mwani.

⁹⁰ Cwale, Horebe ye neli sibaka koo Mulimu na sa zwafite ni sicaba, kakuli ne ba yambaezi kutaha mwa sibaka se mi ba to ipumana mwa buino boo. Mi Abatisa mwa sibaka se, kakuli ne ba salati kuzamaya mwa nzila ye. Ba keluha mwa—mwa nzila tenyene, ba keluhela neku leliñwi la nzila. Mi mane Mulimu aeza nto yeñwi ye ne sabisa. Yena . . . Saeza kuli Mulimu abe ni Mushe

kunga mulamu wa katulo wa na atulisa naha ka ona, ni kunata Licwe, kuli litise mezi.

⁹¹ Cwale, kuna ni tuto yende fa haiba fela lukona kuibona, mwabona. Mi bakenisa kuli luzwanga hahulu mwa nzila, mi kutamiwa hahulu ki lifasi, ni lika zeñwi, sa tiseza Mulimu kunga katulo ya lifasi ni kunata Mwana Hae Tota ka yona, fa Kalvari, kuli lukone kuzamaya lu lukuluhile. Kana mwa bona ze Ni talusa?

⁹² Cwale, fa kuli sicaba se si be ni mezi, ha se ba fitile kwani, sibaka se si omile se neli Kalvari. Mi kwani Mulimu abulelela Mushe, ki hali, “Nga mulamu ni babahulu, ni babañwi cwalo, mi Ni ka yema fa Licwe fapila hao.” Mi Licwe le neli Kreste. Mi Mushe, ni mulamu wa na tizeze katulo fa naha ya Isilaele ka ona, anga ona mulamu oswana wo ni kunata likatulo za Mulimu fa Licwe. Mwabona? A nga sibi sa sicaba kusibeya mwa mulamu woo. Zona, za na lukela kunata sicaba ka zona. Kufita kuli anate sicaba, anata fa Licwe. Mi Licwe, ka musebezi wa Mulimu, la tisa puluso, la tisa mezi kwa sicaba se si shwa. A tisa bupilo kwa sicaba se si shwa. Mi sani kona Mulimu sa na ezize ka kunga mulamu wa Hae—Hae wa katulo ka kota, ni ku nata libi zaka ni za hao ka mulamu woo; ha no lukela ku lu limba, kono wa nata Kreste; kuli kuzwa ku Yena kwazwa *mezi*, a talusa “Moya,” Moya o Kenile wa taha kuzwa ku Yena, ku to lufa Bupilo. Cwale lu na ni Bupilo Bobusafeli. Cwale, Licwe lani neli Kreste. Cwale lubata ku lemuha.

⁹³ Ni boni maswaniso amañata hahulu a za bunangu bwa Licwe le. Ni boni fateni amañwi a ipitezi luli, ha ki kale hahulu, kufitela mane fone kuna ni—ni licwe nyana lene li beilwe fahalimu a lilundu. Mi—mi Mushe na swanela kunata fa licwe le, mi Isilaele inge ainzi fafasi fani ni komoki mwa kunwela tii, kuli aba kele mezi ana lotta fela kuzwa mwa licwe lani. Cwale wani ki muhupulo fela wa mutu.

⁹⁴ Kono cwale Licwe le ha li to tisa mezi a Lona, nekuna ni batu baba fitelela tuu milioni, lu sa bali likomu, likamele, ni zeñwi kaufela ze ne inwezi kwa likotolo za mezi a Lona. Neli kanukana kene ka poomokile kuzwa fani!

⁹⁵ Kona mo ba lika kuezeza Kreste cwalo, Moya o Kenile kacenu. “Ki kufafaleza ko kunyinyani fela.” Mwabona, hanyinyani fela kuli u lumele kuli kuna ni Mulimu. Batili.

⁹⁶ Ki buñata bwa Mezi! Davida naize, “Sinwelo sa ka sa yuboka!” Ki kupoomoka kwa Moya o Kenile.

⁹⁷ Batu ba A saba. Batu babañwi bali, “Kihande, Ni na ni sabo nyana kuli Ni kasana ni eza se kamba *sani*, kamba haiba Ni ya hanyinyani mwa butungi. Ni ka kubonisa yomuñwi ya naile hahulu fahule.” Kono hauna kusupa ku ya na si ka fita fahule hahulu. Mwabona? Eeni, kucwani he ku yana si ka fita hahulu fahule?

98 Cwale, lubile ni batu babakeni mwa nama, ni kukwenuhela kwa neku lelimaswe. Mi—mi isiñi Mulimu, kono sicaba saba . . . Bakeñisa ku sa ba ni zamaiso yende, ni zeñwi cwalo, za baisa kwahule kwa nzila yemaswe, mi bakena mwa buicemeli. Mi cwale lifasi kaufela, diabulosi wa ba supeza uli, “Amubone sani! Amubone sani!”

99 Kihande, haluboneñi ni yeme kakusasana cwana ni kusupa kwa ma milioni a mashumi shumi kufita mo ne bainezi sapili. Kucwani ka bona? Mwabona, mutalime buino bwabona. Mutalime muuna yaswana sina Eichmann kacenu, ni zetuna hahulu. . . Bali, “Mapentekota habana milao yeminde mi haba si ka laelwa, mi ba ka si ituta,” ni zeñwi ze cwalo. Mutalime Eichmann, alimuñwi wa baana baba itutile hahulu mwa lifasi. Mi a bulaya, bana babakuma fa sikisi milioni ni basali ni baana, mioyo ye sikisi milioni. Ha mulukeli kusupa ku mutu yacwalo yoo.

100 Kono mutu yomuñwi ya na sa koni kubala, mane, yana ka biza libizo leliñwi la mwa Bibeles ka mafosisa, mi, kamba mwendi na bulezi nto yeñwi yemaswe, kamba na ezize mafosisa, mitende ibata kuli ñola kai ni kai, ni kubulela kuli, “Ha ba lukeli kusepiwa.”

101 Konakuli haiba zeo ha likoni kusepiwa, kiñi cwale tuto, ni lika zeñwi ni bunangu bo bana ni kacenu? Mutalime Adolf Hitler. Mutalime ngana ya lifasi kacenu. Mubatalime kaufela. Pulelo ya kale iize, “Ze swanela licikwi la ngunga liswanela ni la seke.”

102 Nto yo lukela kuezwa ki ba, ya etelelwa ka Moya o Kenile, kuaba se si lukile ku se si maswe, ni kunga se si lukile ni se si maswe.

103 Cwale, lufumana cwana kuli Kalvari yene babile ni yona ye, ne i hasakile mezi a bupilo kwa sicaba.

104 Cwale, batu babañwi ba ikupulela mwa lipilu zabona ni maikuto, kuli Isilaele kaufela na nwile, mi ba funga likamele zabona ni kutama lindunguli zabona fa lipeleza, ni zeñwi cwalo, mi banga bana ba bona ni kufunduka kulika kusili, mi basiya Licwe mwani, inge lilota mezi. Ao ki mafosisa.

105 Licwe lani la ba latelela, mi mezi ani na ba latelela. Cwale mwa Makorinte Bapili, kauhanyo ya 10, Na sepa, ni timana ya 11, mwakona ku i fumana, kuli “Licwe lani ne li latelela Isilaele.” Kaufela ko ne ba ya kuzwa zazi lani kuya kwapili, Licwe ne li zamaya ni bona, mi mezi na ba latelela.

106 Ha ki mufuta kwa bunde, mi ni—ni kuswala hande kwa ankora ya mulumeli kacenu, ya ziba kuli Licwe lani likile la natwa, Mezi ani ana suluhile kuzwa kwa Kalvari, azamaya ni luna kaufela ko luinzi. Oh, mawi! Ha ki kutela kwa mulaho kwa sibaka sesiñwi, ni kubulela kuli, “Kihande, ne luna ni Mezi maloba, kwani mina.” Luna ni Mezi kacenu, ona fa, kakuli

Licwe lani neli Kreste! Mi Kreste wa swana mabaani, kacenu, ni kuyakuile.

¹⁰⁷ Mwabona, Licwe lani ne li latelela Isilaele. Ne ba sa lateleli Licwe, kono Licwe ne li latelela bona. Amen. Isilaele na zamaya mwa musipili wa hae. Neba na ni fela nto iliñwi ya kueza, zeo kikuli, mube mwa nzila yende, kuliha fela hande kwa naha ya sepišo. Mi Licwe ni mezi za ba latelela.

. . . *Licwe ne li ba latelela:* . . .

Makorinte Bapili imi bulelela cwalo, kauhanyo ya 10. Ku lukile.

. . . *Licwe lani neli Kreste.*

¹⁰⁸ Mulimu nangile likatulo za sicaba ni kulibeya ku Kreste, ni ku Mu nata. Kana mulemuhile, nekuna ni liñoŋope mwa Licwe lani, kuzwa fani kuya kwapili? Licwe nelina ni Liñoŋope kulona, fa na natile Mushe. Mi Kreste nana ni liñiba, Ha natiwa, “Na holofalezi bumaswe bwaluna, mi ka miupa ya Hae lu folisizwe.” Kuzwa mwani Bupilo bwataha Mezi a Bupilo o luikola hahulu kacenu!

¹⁰⁹ Cwale, fa kuli luamuhele Bupilo boo, muhupule, Bupilo bwa Kreste buina mwa Keleke. Haleluya! Oh, haiba lukona kuswala hande mihupulo yaluna foo ka mizuzu ye mashumi yetatama! Kreste ha si yi Keleke. “Ni kaba ni mina kamita, mane kuisa kwa mafelelezo a lifasi.” Ki sicaba se si siyanga Kreste, isiñi Kreste kusiya sicaba. Ki batu baba Mu siyanga, ka ku sa lumela kwabona. Ba siyanga Kreste, isiñi Kreste kusiya sicaba.

¹¹⁰ Isilaele na zwile mwa nukana, isiñi nukana kusiya Isilaele. Mwabona? Kakuli, Bibebe ibulela hande kuli, “Licwe ni mezi ne li latelela Isilaele.” Kuba laetelela! Kaufela kone baya, Ne liya, nilona.

¹¹¹ Oh, Ni ka tabela, kakusasana cwana, kambe luna ni nako, kuli luapule mwa kaufanyo ya 1 ya Joshua, fa Na bulezi kuli, “Kaufela ko ku ka hata lingandi za mahutu a mina, Ni mi file sibaka seo. Kaufela ko u kaya, Mulena Mulimu wa hao una ni wena. Usike wa saba mutu. U tiye pilu! Kaufela fela ko ka hata lihutu la hao, Ni teni ni wena kwateni koo, hakuna taba kamba ki kai.” Mulimu kuzamaya ni Joshua!

¹¹² Mulimu yaswana uzamaya ni Keleke ya Hae kakusasana cwana. Ha lu nweñi kwa Liweluwelu lani mwabuse. Kaufela ko uka hatisa singandi sa hao, teñi koo Mulimu uka ba ni wena, ku ku selaela ni kukufa Bupilo. “Ni kaba ni wena kamita, mane kuisa kwa mafelelezo a lusika.” Kreste wa swana maabani, kacenu, ni kuyakule. Ki milao ya Mulimu.

¹¹³ Cwale mu li, “Cwale Muzwale Branham, kiñi ha lu saezi lika ze lu lukela kueza? Ki kabakalañi limpo zaluna ni lika zeñwi mwa keleke ha li sa ezahalile ka swanelo yazona, mo li lukela kubela? Kutaha cwani kuli keleke yaluna ha i nanuhi kutaha fa

sibaka fo ilukela kutaha?” Sicaba, mwa nako ya muliko, sa zwa kwateni sina Isilaele mwa na ezelize. Ba nahana kuli Mulimu na ba siile.

¹¹⁴ Kono, muhupule, Licwe ne lisika siya Isilaele. Isilaele na siile Licwe, a libala Licwe ka kuba ni bona ka nako kaufela. Neli ona fani, aya ni bona kuisa kwa mafelelezo a musipili. “Na li ba latelela.” Ne ba siyo kwahule kuli bapalelwe kubulela. Ne ba siyo kwahule kuli bapalelwe kuutwa. Kusi cwalo, ne ba siyo kwahule kuli bapalelwe kubona.

¹¹⁵ Mi neba Krete na si cwalo! Ni Keleke kacenu, Hayo kwahule kuli lupalelwe ku muutwa habulela. Babañwi ba mina mu wile, ni kueza zemaswe, mi mu latehezwi ki tabo yani, mi Mezi a hao sa omile. Usali kwahule abulela ha utwahali. Wa ku latelela. U ziba muzamao kaufela o eza ni lika kaufela zo eza. U libelela ku utwa ku ha u Mubiza.

¹¹⁶ Mi muzamao omutuna wo wa kacenu, Mulimu u mi libelezi kubisa ku Yena kuli atahe. Ha u yo fahule hahulu ni Yena. Ni ha lu fosize, ni kueza sibi, ni ku Mu fa mikokoto yaluna, ni—ni kueza kaufela ze ne lu sa swaneli kueza, kono niteni Uina ni luna. Krete na bulezi kuli Ukaba ni luna.

¹¹⁷ Bibeke ibulezi kuli, “Mezi na latelezi bana ba Isilaele.” Ha ne bana ni linyolwa, ba ziba kuli mezi na li fakaufi.

¹¹⁸ Cwale, lika ze li zamaiswa ka milao. Mikwa ya Mulimu kaufela i sebeza ka milao. Cwale lu kanga za. . . Ha lu yemeñifa muzuzu.

¹¹⁹ Ha lu ngeni lifasi. La potoloha, mwa liholo ze twenti-foo kaufela lipotoloha hañwi, ka swanelo handende, kuli. . . Ha lu si ka kona, ka sayansi yaluna kaufela, kuba ni waci yekona kupunda nako ye kwanile hande. Fa ni fa, liwaci zende hahulu zebakile bapanga fateni, ha si yo kwana silimo, lika atisa kamba kulatehisa kwateni mizuzu yemiñata. Kono lifasi ha li palelwi kono lizamaelela feela handendende fa muzuzunyana wa lona. Ki nto yepetehile hahulu kuli ba sayansi kacenu, baituti ba linaleli ba ka mi bulelela kuli, mwa lilimo ze mashumi a mabeli kuzwa cwale, lizazi ni kweli handende li ka silana. Ha li potolohile ka liholo ze twenti-foo hañwi, mi lona lizamaya mwa nzila ya lona ka mwaha, ha li lyanganisi niheba hañwi. Haleluya! Ki kupetahala, kakuli li zamaya ka mulao wa Mulimu.

¹²⁰ Za ziba handende nako ye kuba ni liñungwa lani, kulikana ni muzuzu wa lona, kakuli za ziba nako kweli ha i ka shenyeza mwatasi kwa lififi. Mi Mulimu ubeile lika kaufela handende ka mulaho. Mi cwale kweli yani ha i ya kwa lififi, liñungwa li ka zamaelela ni yona. Kweli ha i tasa, liñungwa ki leo la taha ni yona. Mi za ziba handende, ka linako zatani, nako yeo kweli haiya kwa lififi. Bakona kulibeya mwa buka ye nuha linako ni myaha, ni ku mi bulelela, ka muzuzu kusiba kumbwinja, liñungwa lani halikala kufukuzeha. Luli, kakuli cwalo kona

kweli mo i ka zamaela, kakuli i beilwe mwa sikuka cwalo ka mulao wa Mulimu.

¹²¹ Ne ni yemi, zazi leliñwi, kwa lisa la Lake Michigan. Mane seniya ni kwa Lake Superior, mwa musipili waka kuliba kwa Canada, ona mezi amañata ani. Mi Na yema fani se Ni hupula kuli, “Ki limaili zekai kusila mezi a kuya mwabuse!” Mi ha se Ni silile Mich- . . . kamba Lake Superior, Na taha kwa Michigan, niyona libata kulikana mezi azona. Mi ni kwani, kuzwa kwa Lake Superior kuya kwa Lake Michigan, kuzwa kwa Lake Michigan kuya kwa Lake Ontario, mi fela . . . ni Huron, ni linuka zeñwi hamoho. Ki mabilioni amañata cwani kualula ka mabilioni ni mabilioni, ni mingomo yesabaliwi ya mezi ainzi mwa nuka yani!

¹²² Ni kuyo punya kwa Nevada, ni mwa Arizona, New Mexico, Eastern California, kuna ni mamilioni a mañata, a sibaka se si cisa. Se si na ni mununo kuli, haiba mezi ani ba ka fita kwa sibaka sani, naha ye ne ika fepa lifasi loote, kusina neba batu baba shwa tala, ni kuba ni zeñata zekona kuyumbelwa fela mwa liwate. Yeo ki niti! Mamilioni a mubu aka lima mamilioni ni mamilioni a makwili ni kabici, ni manawa ni—ni miloho, ni mayangayanga ni miloho, ni mawakaka, ni zeñwi kaufela. Zekona kulimiwa kaufela, zeo—zeo litokwa fela mezi.

¹²³ Mi ki a mezi fahalimu *kwanu*, mi mubu ki wo *kwanu*. Cwale lwakona ku bona, mi luziba kuli likaba ona cwalo, kakuli lwakona kutatuba mezi ni kubona bunca bwa ona, ni kutatuba mubu ni kubona mununo wa ona. Cwale, kuakaleza kaufela ko lukona kueza, hakukoni ku libeya hamoho. Kono, kuna ni mulao, mi mulao wo usebelisana ka bukiti bwateni. Cwale, haiba lukona kubeleka kuya ka bukiti bwa mulao, lwakona kuselaela sibaka sateni kaufela sani, kunga mezi kuzwa mwa masa ni ku li selaela. Kono lu swanela kusebeza kuya ka mulao wa bukiti ni sibaka. Halukoni ku ikumbuta fela kafoo. Halukoni kuhuwaka fela kafoo. Halukoni ku kalumukanga fela kafoo. Lu swanela kubeleka kuya ka mulao wa bukiti bwa sibaka, kuli akone kutaha mwateni. Mulimu ubeile lika kaufela ka mulao.

¹²⁴ Kwanu, Ne ni sweli kunahana, Ha ni zibi haiba Ni kile na mi bulelela taba ye, kamba nee. Nenili kwani kwa Kentucky, kuyo zuma tumale, ni Muzwale Wood, seli silimo cwalo kwa mulaho. Mi selu . . . Tumale ne tu pala kufumaneha kabunolo, mi se luya kwa ndu ya mutu cwana, ku yo buza za kuzuma. Muuna yani nana ni litema lelituna luli la mushitu, mi litema lani nelina ni likota luli. Kono Muzwale Wood ani bulelela, kuli, “Muuna yani na sa lumeli za bumulimu. Ki—ki ya sa lumeli.” Mi abulelela kuli na mu ziba, kacwalo yena . . . kamba bondatahe ne ba mu ziba, aya kwani kuyo kupa haiba ne luka lumelezwa kuzuma mwateni.

125 Lwa ya ni mota ku yo punya kwa sibaka sa ndatetuna yoo. Mi yena ni muuna yomuñwi, bubeli bwa bona mwa butaka bwa ma sebente cwalo, nebainzi mwatasi a kota ya apule. Mi Bo. Wood baya ku muuna yoo, mi bali ku yena, “Ni kupa kuzuma kwateni mwa sibaka sa mina sha?” Mi ki hali, “Kihande,” abulela ali, “ku lukile.” Ki hali, “Ki wena Wood mañi? U mwana Jim Wood nji?”

Ki hali, “Kina sha.”

126 Yena ali, “Kihande, Jim muuna muhulu na sepahala, ni zeñwi cwalo.” Ki hali, “Wakona kuzuma kaufela ko u bata, mwa sibaka saka. Nina ni ma eka amañata mianda anda mwa sibaka se, kena uiponele. Zamaya mwa liangashitu leo, kaufela ko bata kuya. I kutwe fela ku lukuluha.”

127 Na inge ni inzi mwa mota, kakuli Ne ni hupula kuli mukutazi ni ya sa lumeli za bulapeli habakoni kuswalisana, ha ne ni ka kupa sika ku ya sa lumeli za bumulimu.

128 Kona kuli kasamulaho nyana, Muzwale Wood ali, “Kihande, cwale, Ni bize mulisana waka atahe? Ni sepa kuli ki hande ni yena atahe.”

129 Mi muuna muhulu yo asikuluha fa mulamu wa hae, mi ali, “Wood, u ni bulelela kuli kona mo se utotobezezi hahulu mwatasi cwalo, kuli mane konji uzamaye ni mukutazi kaufela ko uya?”

130 Ni kuli kanti, Na hupula, kuli, kanti Ni tuluke fela mwa mota. Kacwalo Na tuluka mwa mota, ni kuikambota ni muuna muhulu mizuzu nyana. Mi a ni zibisa kapili kuli nasina za kueza ni bakutazi, kakuli na hupula kuli ne ba bulela lika ze ba sa zibi.

131 Ki hali, “Ba mbwasaukanga fela ze ba zibi mane. Kihande,” yena ali, “mutu ha ambola ku na, Ni bata kuli azibe zasweli kubulela.” Cwale, yeo kona ngana yende. Yeo kona ngana yende. Ki hali, “Cwale, haiba mutu u ambola ni na, Ha ni tabelangi kuli abulele lika lisili, fela, mane za sa zibi sika ka zona. Ni bata kuli abulele lika za ziba hande.” Kihande, Na kuteka sani. Na kuteka mubulelelo wa muuna muhulu yani.

132 Mi kacwalo Na li, “Kihande, eni sha, mutu kaufela una ni mubonelo wa hae.”

133 Mi ki hali, “Nekuna ni mukutazi yakile ataha kwanu, myaha nyana yelikani kwa mulaho, yana bile ni mukopano kwa Acton.” Mi ki hali, “Mukutazi yoo, busihu bo buñwi, niha na li muenyi mwa sibaka se, ali ku—ku kalibe yana inzi mwa sicaba, ‘Una ni taulo mwa pokoto ya hao. Mi wena u musala Bo. *Ngete-ngete* cwalo. Mi una ni kezeli ya kula kwabuse bwa lilundu lee. Libizo la hae ki mukete wa *Kuli-ni-kuli*. Wa shwa, ni kansa ya mwa mba.’ Mi kihali, ‘Nga kasila kao ni ku ka beya kezela hao yoo, mi u mubulelele kuli, “SA BULELA MULENA KISONA, hana kushwa, kono uka pila.”’”

134 Ki hali, “Musali yaswana yo neli mulikana luna.” Mi ali, “Lwa nga musali yo. . . Lwaisa ka taulo ka; kamba muuna yoo,

kuiseza mutu yani.” Pili abulela kuli, “Musali yo, musalaka ni Na ne luliteni kwani kakusasana wani mi lwaisa, ni kulibelela musali yoo. Mi na kulile hahulu! Madokota ne ba mu supilwe munwana, kale kale. Na kulile maswe kuli nelu mu zamaiseza fela mwa shiti, kumu nanula ku mu inisa fa cemba, ni ku mu lobaza hape. Ku mu futula mwa shiti, na kulile maswe maswe luli.” Ki hali, “Busihu bulibufwi, ona kwani, kwa utwahala lilata inge kuli kushwile mutu.”

¹³⁵ Yani neli Ben kwani, ni ka taulo kani, inge akaisa ku yena kwani. Ni sepa kuli neli wena, nji ne si wena Ben? [Muzwale Ben uli, “Amen. Amen.”—Mu.] Neli Muzwale Ben kwani, anga ka taulo kani, kakuli ki yena yana isize musali yani kwani.

¹³⁶ Mi ali, “Habusa kakusasana, na sweli kuicela ma apule a halikilwe ni nama.” Mi ali, “Ha ikezezi fela misebezi ya hae, kono utusa ni ba bapani ni bona mwa misebezi. Na iketile fela hande!” Ki hali, “Cwale Ni bile ni komokanga. Haiba Ni ka mubona fateni mukutazi yani, na ziba za na bulela,” ali, “Ne—Ne ni ka tabela kuambola ni yena.”

¹³⁷ Muzwale Wood ani talima ka kuni kecula, mi Nina na mu talima. Ne leyemi fani, ni masila, ni mufufuzo ni kusetefala, ne lu sweli kuzamaya mwa mushitu, ni—ni mali a tumale alambnakilwe mubili kaufela kuluna. Mi kacwalo Na li, “Kihande,” Na li, “ki . . . U talusa kuli no ka ambola ni yena mi na ka ku bulelela mwa na ezelize cwalo?”

Ki hali, “Eeni, sha, kona ze Ni talusa.”

Na li, “Kihande, yeo—yeo kinto yende.”

¹³⁸ Ne ni sweli kuca ilinwi ya ma apule a hae. Likokwani zefufa fufa neliswe ku luna fateni, mwa ziba, neli nako ya litabula, kweli ya Muyana. Konakuli Ne ni sweli apule nyana ye, mi Ne ni i monkozi. Mi Na li, “Ye ki apule ye munati.” Na li, “Kota ye se ibile nako yekuma kai fani?”

¹³⁹ “Oh,” ki hali, “Kina ya na cezi kona yeo foo, myaha ye mashumi amalalu kamba amane kwa mulaho, kamba nto yeñwi cwalo.”

¹⁴⁰ “Eni, sha.” Na li, “Ni tabela fela ku kubuza puzo.” Na li, “Ku konahala cwani . . . Ni bona ma apule ao asweli kuwa kwa kota, mane ni matali ayona asweli kuwa kwateni, kanti nako ye mane ki fahala kweli ya Muyana.” Mi se Nili, “Halusiba fateni ni moya o bata, kamba neba kuba ni kukangela kamba ze cwalo, kanti mane matali ani asweli a bulumuka kwa likota. Kutaha cwani walo?”

Ki hali, “Mezi a yona azwile mwa kota.”

“Oh,” Na li, “ki kai kwa ile?”

A li, “Akutezi mwa mibisi.”

Mi se Nili, “Cwale akaina nako yekuma kai mwatasi mwani?”

Ki hali, “Kufitela nako ya mbumbi.”

¹⁴¹ Mi se Nili, “Kona aka kuta hape, ni kukutiseza matali amanca a muluti, ma apule amanca a kuca.”

Ki hali, “Ki cona. Ki niti luli.”

¹⁴² Na li, “Kihande, Ni bata ku kubuza taba yeñwi, muñaka. U bulela kuli batu ba ha ba zibi ze ba bulelanga.” Na li, “Wakona ku ni tolokela Ngana yetina kuli mezi ao asiye kona? Hana ka inelela mwateni kufita nako ya maliha, kota yakona kushwa. Wakona kubulaya kota. Peu ya bupulo mwa mezi ayona ani.” Kacwalo Na li, “Akona kubulaya kota. Ki Ngana mañi yetisa kuli mezi ani asiye kota yani, kukena konji kwa mibisi, ni kuina kufita nako ya mbumbi, mi ni kukuta hape ni kutubula mane kubeya ma apule amañata?” Na li, “Sela mezi mwa buleke ni ku butoma fa musumo, mi ubone haiba, ka Muyana, aka fita fafasi a musumo ni kukuta hape mwa nako ya mbumbi. Mwabona?” Na li, “Kuna ni mulao, kuna ni mulao wa ze bupilwe. Ngana yeñwi ye beile mulao wo hande cwalo. Ha ki seo fela, kona ona Ngana yeswana yeo ibeleka ka mulao, o a isa mwatasi a kota, ni kukuta hape.”

Ki hali, “Ha ni si ka nahana kale cwalo.”

¹⁴³ Na li, “Wakona kana . . . Haiba uka fumana Ngana yeeza mezi a kota ye kuzwa mwa mitai yani, kukena mwatasi mwa mibisi ni kukuta, ki yona Ngana yeswana yene ni bulelezi zani busihu bwani, ‘Zamaya, uapese kataulo kao ku musali yani.’”

Ki hali, “Mi ki wena mukutazi yani?”

Na li, “Eeni, sha, kona ona cwalo.”

¹⁴⁴ Silimo sesi felile Ne nili kwa (sa timezi cwale), mi mbelwa wa hae hana inzi fa makenelo, inge ayebula ma apule, azwa kwa kota yeswana yani. Muzwale . . . Pili neba bata ku lu lelekisa, ne ba sa zibi kuli kiluna bomañi. Mi Na yo bulelela musali ka zona, kuli ne lu filwe tumelelo ki muuna. Ni kubulela ka zona, ali, “Na amuhezi Kreste ka kutala asika shwa kale.”

¹⁴⁵ Mwa bona, kana kota yani ieza sikamañi ki Ngana mañi ye beleka mwateni? Ki mulao. Ki mulao o Mulimu abeile mwa sikuka. Mi mulao wani ki mulao wa Mulimu oka tokomela lika. Amen.

¹⁴⁶ Mwa ziba, Hanina taba kamba uka huwa kufita kai, ni kubulela kuli—kuli cwale, “Halina kuezahala, lizazi halina ku monyeha mwa mbumbi ye.” Li ka monyeha, kupale kumane. Zo ka bulela, “Na—Na—Na hanina kulumeleza busihu kutaha.” Bu ka taha, kupale kumane. Kakuli sika selupila ku sona see, se si bizwa lifasi, si zamaiswa ka mulao wa Mulimu.

¹⁴⁷ Cwale, mizwale ni likaizeli, Ni bata ku mibuza nto yeñwi. Mi, haiba lu pepilwe sinca ka Moya wa Mulimu . . . Mulimu hana liemba ze fokola ni zeñwi ze tiile, Yena ki Mulimu ya tiile maneku kaufela! Mi haiba una ni Mulimu ka buñata ku wena, kuli mane konji fela muluti, ao ki mata amatuna akona kubupa lifasi lelinca. Ao ki mata amañata akubupa kweli yenca ni mulao wa zona omunca. Ki Mulimu, mi u tiile! Mi ona fa cwale mulumeli kaufela mwahali mo una ni Bupilo bwa Kuyakuile, bwani kibufi, Moya wa Mulimu ku wena; ki Mata amañata akona kuzusa bafu, akona kufolisa bakuli, akona kubeya zebupilwe mwa mbyumbyulu kuba ka mulao wa zona. Kono wena, li zamaiswa ka mulao, ona Moya o li ku wena. Mu bana ba bashimani ni basizana ba Mulimu. Ona Moya o swana wani oli ku wena, uka ku zusa ka lizazi la zuho.

¹⁴⁸ Jesu, ha Na li fa lifasi fa, ha Na shwile, moyo wa Hae wa shetumukela mwa Lihele, “Mi akutaza kwa mioya yeneli mwa tolongo, mioyo yeli mwa tolongo, ye ne sika baka mwa mazazi a pilutelele ya Nuwe.” Mubili wa hae wa ya mwa libita. Kono Asika shwa kale, A beya Moya wa Hae mwa mazoho a Mulimu. Moya wa Hae waya ku Mulimu; moyo wa Hae waya kwa Lihele; mi mubili wa Hae wa ya mwa libita. Mi Jesu a haniswa kuzuha kufitela Mañolo a talelezwa. Na sike a kuta, kakuli Na lukela kuina mwa libita ka mazazi a malalu ni masihu. Kono cwale Mañolo a to talelezwa kaufela, sitibiso seo sa zwiswa fateni; Moya wa Hae wa shetumukela mwa moyo wa Hae, moyo wa Hae kuya kwa mubili wa Hae, mi Azuha hape.

¹⁴⁹ Mi ha lu shwa, mioyo ya luna iya mwatasi a aletare ya Mulimu; kone Ni bile ni lithonolo ku yo bona, kakusasana omuñwi ha ki kale hahulu, sina ha mu ziba, mwa pono, fo ibulela Bibeze zateni. “Mioya ya luna ikaya ku Mulimu Yana i file, mi mibili yaluna ikutela kwa liluli la lifasi.” Kono zazi leliñwi, Mañolo ha sa talelelizwe, mioya yaluna i ka tamululwa ki Mulimu, ika nanula moyo, mi moyo uka nanula mubili. Mi Mata aka lu zusa, ateni kale ku luna cwale! Luna cwale lu mwa libaka za Mahalimu. Kale kale lumwa Mata zuho.

¹⁵⁰ Haiba ne ku si na mulao ku zeo, bana ba bashimani ni basizna ba Mulimu neba ka bupa lifasi leliñwi fa kale kale ni kuyo pila bupilo bobuñwi kulona. Muna ni Mata mwahali ku mina akueza cwalo. Haiba una ni muluti fela wa Mata a Mulimu kuwena, una ni Mata akona kueza cwalo. Mulimu ki ya mata kaufela. Mwabona ze Ni talusa? Mata ali kuwena kona aka eza zeo. Wakona kubulela mi lifasi la taha mane waya u yo pila kulona. Haleluya! Ki fo he cwale.

¹⁵¹ Kona Mata aliteni mwa Keleke cwale, kono a zamaiswa ka mulao. Mi mulao woo ha ki “kubuluka sishañata sa milao.” Ki mulao wa tumelo. Jesu naize, “Kaufela za konahala ku baba lumela.” Mi haiba wakona ku lumela, kaufela Mulimu sa ka etelela moyo wa hao kulumela, sona seo ki sa hao. Sibaka

kaufela ko ku ka hata lingandi za mahutu a hao, ka tumelo, Mulimu wa ku fa sona. Amen! Ki sa hao, una ni sona, haiba ukona kufumana sinotolo kwa mulao wa tumelo woo kipeto si ka ku kwalulela sona. Mwabona se Ni talusa kana? Mata ani a zamaiswa ki. . . Haiba u mwana Mulimu wa mushimani, wa musizana wa Mulimu, zeo ha lina kuku siya. Li ina ni wena ka nako kaufela. Kono, tumelo ya hao ikaba kwahule ni Zona, kono I saliteni. Haleluya!

¹⁵² Ha u pilisizwe, Mulimu u kufa tumelo ya kuzuha kuzwa mwa sileze za lifasi. Tumelo ya hao ikoma lika za lifasi. Tumelo ya hao ki sikamañi? Tumelo ya hao mwa kezo yeo Mulimu u ku ezelize, kuli ube mwana Mulimu. U tuhezi buhata bwa hao, utuhezi ku uzwa kwa hao, utuhezi kunwa kwa hao, kakuli tumelo ya hao i ku pahamisize fahalimu zeo. Amen. Ha u sa ezi cwalo, hauna tumelo niheba yekana. “Mi ka tumelo u pilisizwe, mi zeo ki ka sishemo.”

¹⁵³ Kuya fela tumelo ya hao mo ikona ku namuluhela, kona Mata okaba ni ona fa ka kuma, kakuli ku wena kuna ni Mata akueza Lihalimu ni lifasi. Mulimu upila ku wena, mina mu bana ba bashimani ni basizana ba Mulimu. Amen! Kifo he cwale. Kono, ki tumelo ya hao. Jesu naize, “Kuya ka tumelo ya hao, kube cwalo kuwena. Haiba ukona ku lumela, kaufela za konahala. Kaniti, Ni li ku wena, ha u ka bulelela lilundu leo kuli, ‘Shimbuluka tuta,’ mi u sa kakanyi, kono u lumela kuli so bulezi.”

¹⁵⁴ Cwale lu swanela kuba batu ba mufuta, o cwani, kakuba ni tumelo ku Kreste ya lu liuluzi yoo mane ki ya pila ku luna, lona Licwe le li natilwe lani le li sa siyi Keleke? “Ni ina ni mina kamita, mane kuisa kwa mafelelezo a lifasi,” Kubateni kwa kamita kwa kupoomoka kwa Mata a puluso yene suluhile kuzwa fa Kalvari kutaha mwa Keleke, Kubateni kwa kamita kwa Mulimu yapila, kububa kokutuna, Licwe leli natilwe le li zamaya ni luna mwa musipili waluna.

¹⁵⁵ Isilaele na latehezwi ki tumelo ya hae. Ba zwa mwa nzila. Ba kala kulakaza ma nama ni lipoto. Kambe ne bakaina ni tumelo, ni kulumela kuli Mulimu na ka baisesa mwa naha yani, nekusike kwaba se ne si ka ba tibela. Ne ba se ba kwaluzi kale mawate, ne ba natile likoto fa lila za bona, ne ba takisize kale lila za bona kwa mulaho, mi ne se bakeni kale mwa naha, kono niteni ne ba sina tumelo ya kuya kwa sepiiso.

¹⁵⁶ Joshua ni Kalebu nebana ni tumelo! Ne baize, “Luna ni mata amatuna mane lwakona ku koma sika kaufela se si ka taha fapila luna.”

¹⁵⁷ Boo kona butata ni keleke. Lwakona ku koma matuku kaufela. Luna ni Mata mwahali ku luna. Lu bana ba bashimani ni basizana ba Mulimu, hakuna se si kona ku lu yemela mwa nzila. Nto inosi fela, Ubata kufumana mutu yaka lumela cwalo, ya ka lumela sa ku ezelize kale Mulimu. Isiñi kuli *lukaba*; lu

cwalo ona fa! Mi Kubateni ko kupila kamita kwa Moya kuna ni luna. Amen! Ki fo he cwale.

¹⁵⁸ Zeo kona ze Ni talusa ha Ni bulezi tuto ye kakusasana cwana kuli, *Mezi Amwa Licwe Afumanwa Nako Kaufela*. Mezi amwa Licwe ateni ona fa cwale, ona Mezi amwa Licwe afumana kamita kuzwa fa Licwe la Kalvari. Moya o Kenile wani ha u to zwa ku Yena fa Kalvari, kona o no kutezi mwa Keleke ka Lizazi la Pentekota, ona Moya o Kenile oswana wani uteni mo kakusasana cwana. Mi u lu file sepišo!

¹⁵⁹ Leo kona libaka, ha lu zamaya fapila bakuli, ha Na ni lumile kwani, Na mu lumela; Mulimu ki yena yabulezi cwalo! Kona ni lipono mo liezahalelanga; Mulimu na li sepišo! Mulimu hakoni kubulela buhata.

¹⁶⁰ Mulumele cwale! U swanela ku lumela. Ku swanela kuba Sesiñwi mwateni mo, kwalula sibaekiso seo, kwalula sibaekiso seo kuli ukene hande ku ona. Se lutokwa kacenu ha ki kulapelela Mata amañata. Una ni Mata amañata ni kale akona kubupa lifasi leliñwi. So tokwa ki tumelo ya sebelisa Mata ao. So tokwa ki zamaiso ya bupilo boo, ni kupila bupilo bwa bumulumu, kuli Mulimu ha ku kupa sika, mwa ziba! Luna ni sepo ku Mulimu, ka seo. Lwa ziba, haiba lu buluka Liatelo za Hae, Hakuna za ka lu tima, haiba lu zamaya ni Yena. Mulimu kuzamaya ni luna. Oh, mawi!

¹⁶¹ Nebana ni fela nto iliñwi ya kueza. Nebana ni nto iliñwi fela ya kueza, yeo, ki kuina hande ka swanelo. Isiñi kuyaulukela neku *le*, ni kuyaulukela neku *lani*; kono kuinelela mwa sikuka! Keleke ina ni nto iliñwi fela ya kueza, kuinelela mwa sikuka! Nebana ni Siita sa Mulilo, se ne banani, kuli si ba buluke mwa sikuka ka kulatelela Siita sa Mulilo sani. Kona sene si ba etelezi. Kona se ne ba bona, sona Siita sa Mulilo sani. Ne ba si boni inge Si beleka ni Mushe, mi ba ziba kuli nali yena muzamaisi yani.

¹⁶² Kacenu luna ni Linzwi. Lu latelela Linzwi. Mi lubona Linzwi inge li beleka mwa balumeli, mi luziba kuli ku cwalo, kanti. Mulimu inza beleka ni luna, inza paka Linzwi ni lisupo inge li latelela! Lu ina ni Linzwi. Linzwi litisa linepo zatani.

¹⁶³ Ne ba inzi ni Mushe. Kakuil, Siita sa Mulilo, Mushe na Si latelela. Mi ne ba latelela. Ha ba kala kukwenuhela Mushe, ni ku kananisa Mulimu ni kukananisa Mushe, ba kala kukeluhela kwa neku leliñwi ni leliñwi. Matata ataha mwateni. Luli.

¹⁶⁴ Luina ni Linzwi, mi Linzwi litisa lisupo. Jesu naize, “Lisupo ze li ka latelela baba lumela Linzwi.” Mwabona, li ina hamho ni. . . Mu pile ni Linzwi, Linzwi litisa lisupo. Kono, Mushe, kiñi sa na ezize?

¹⁶⁵ Ba keluhela kwahule, mi kiñi se ne ba ezize? Ba keluhela kwahule ni nzila, mi ba latehelwa ki sesitisa mezi.

166 Ni sepa kuli kona se i ezize keleke kacenu. I keluhezi kwahule ni Mañolo. Bakeni mwa milao lao. Bakeni mwa lika zeñwi ze ba sa lukeli kuba zona. Ba ikungezi litaba zeñwi. Ba ikungela lika zeswana sina Tumelo yaba Apositola. Ki kai ko mufumana zeo mwa Biblele? Ne ba ikungezi katekisema kone ba bala. Ba ikungela likopano mwa sibaka sa kuba ni kutwisiso. Ba ikungela kuswalana mwa mazoho mwa sibaka sa kupepwa sinca. Ba ikungela kufafaleza mezi mwa sibaka sa kolobezo ya mezi. Ba ikungela mufuta wa bumaswe wa, “Ndate Mwana, ni Moya o Kenile,” kanti mane hakuna nto yecwalo mwa Biblele. Biblele ibulezi kuli, “Ka Libizo la Jesu Kreste!” Kuna ni fela nto iliñwi ya kueza haiba ubata Mezi aswana ani, kutela mwa nzila yani hape. Kutela mwa . . . Ha si ka ya kale; Usali yeni mo. Mu amuhela lituto za litumelo mwa sibaka sa Kreste. Mwa yembana kuba ni buhali.

167 Yomuñwi naize, “Kihande, Ni wa Methodist.”

Zazi leliñwi, “Ni wa Baptist.”

Seo sibonisa kuli ha u Mukreste, kanti. Lu Bakreste! Lu ba Hae.

Mu li, “Kihande, haiba, na, ni wa Baptist nji?”

Haiba zeo kona zo li zona, konakuli ha u wa Kreste, u wa Baptist.

Mu li, “Kihande, Ni wa Pentekota.”

Haiba u wa Pentekota ka kopano, kona so li sona fela.

168 Kono, haiba u na ni kutwisiso ya pentekota! Mi Linzwi la pentekota li ka tisa kutwisiso ya pentekota! Mulatelele lika zeswana zene ba latelezi balutiwa zeo, muinelele ni zona kufitela mutazwa ka Moya o Kenile.

169 Mi cwale haiba seo si shutana kwa Linzwi, moya oli kuwena uzamaya ka kushutana ni se si bulelwa ki Linzwi, kona kuli ha ki Moya o Kenile kanti. Ki diabulosi ya likanyisa Moya o Kenile. Mwa bona fo lu ifumani? Oh, babañwi ba luna lu bulezi fateni mwa malimi, lubile ni mioya ya kuhuwa yecwalo, zeo lihana lika zeñwi kaufela. Lu amuhezi lika kaufela ze si za Mañolo kutaha mwa keleke. Ko luya kacenu? Lu kutezi mwa lihalaupa leliñwi, kopano ye omelezi. Lu ikopanyize, mi lu latehezwi ki Mezi aluna. Ona seo kona se i ezize Pentekota. Ha ikala ku ikopanya, ya kala kuikaba mwa kutwano, ni kubulela kuli, “Kihande, cwale haluna kuba mwa bulikani, haiba mutu yo alumela *cwalo*.”

170 Zwelapili, pina ni yena kufitela ataha kwa Linzwi la Niti, zibo ya kuziba Niti. Kaufela seo sili sona, ha si zamaye, nihakuli cwalo. Zwelapili fela, mube sina mizwale.

171 Kono, oh, neluna ni kuongaonga, ni kubulela kuli, “Kihande, kakuli ha mu ba Oneness, kakuli ha muba Twoness, kamba Threeness, kamba ze *cwalo*, haluna ni kutwano ni mina.” Mi

cwale lueza cwalo, lueza sikamañi? Lu itahisa handende mwa lihalaupa hape. Yeo ki niti!

¹⁷² Kono, muhupule, mi Isilaele akeluhela kwahule ni nzila, nzila yeliba kwa naha ya sepiso, Licwe ne li sa ba siyi; Ne li inelezi ona fani, kona ni mezi mwa nainezi cwalo. Kona mo kuinezi ni Moya o Kenile, uinelela ona foo. Ha lu lukeli kukeluhela kusili.

¹⁷³ Cwale, fa Mulimu u lu luta nto yetuna. Mulimu ulu luta tuto kulo faa. Kreste na natilwe hañwi, ku lufa kutwisiso ya pentekota, nako iliñwi, kwa nako kaufela. Cwale, mi Licwe lani ha ne li natilwe, Ne li sa lukeli kunatiwa hape. Ne li natilwe fela hañwi.

¹⁷⁴ Mushe na ezize mafosisa ka ku Li nata habeli, kubonisa kufokola kwa tumelo mwa Sitabelo. Kono cwale Kreste na natilwe hañwi, luziba kuli Hana kunatiwa hape. Kihande, kiñi sana sweli kueza Mushe? Mushe nasweli kutoma nto yeñwi yenca, kulika kueza nto yenca.

¹⁷⁵ Mi cwalo kona bakutazi ba ezelize kacenu. Ba likile kulieza ka bunca. “Lu ka ikeza kuba ba Assemblies of God. Lu ka ikezeza yaluna kuli Pentecostal Church of God. Lu ka ikezeza katengo ka ba General Council. Lu ka ikezeza *se, sani*, kamba *sesiñwi*.” Seo hakisona sa ba ezize Mulimu. Wo ne si ona mulelo wa Hae.

¹⁷⁶ Kreste na natilwe hañwi. Yeo kona kutwisiso ya makalelo. Yeo kona nzila ya makalelo. Ka Lizazi la Pentekota, Pitrosi ali, “Mubake, mañi ni mañi wa mina, mi mukolobezwe ka Libizo la Jesu Kreste.”

¹⁷⁷ “Lu fafaleze ka libizo la ‘Ndate, Mwana, Moya o Kenile,’ kutisa mifuta kaufela ya lituto za litumelo ni zeñwi kaufela za Teni.” Ha lu zwa mwa Linzwi, ki kabakaleo halukoni kufita fahule. Mwabona?

¹⁷⁸ Mulimu ulu luta tuto faa. Mushe na sa lukeli kubulela kuli, “Cwale lu ka kalisa nto yeñwi yenca cwale, mi lu ka ongaonga ni kupanga keleke ya Katolika.” Yeo kinto yapili yene ba ezize. Batili, mi kasamulaho wa fani, “Kihande, lu ka kalisa nto yenca kuzwa foo, lu ka panga ya Lutheran.” Mi kwa taha yaba Anglican, mi ni ya Baptist, ni zeñwi kaufela, ni ma Campbellite, ni Church of Christ, ni antikreste, ni lika zeñwi kaufela. Mwabona, kaufela ba kalisa kuya cwalo, yeñwi mwa mulaho wa yeñwi, yeñwi mwa mulaho wa yeñwi, kueza likopano ni tutengo. Ne si cwalo. Mwabona se basweli kueza foo? Basweli kunata Licwe hape, kukalisa nto yeñwi yenca. Ha lu tokwi tuto yenca.

¹⁷⁹ Mutu kaufela mwa Bible na kolobelizwe mwa Libizo la Jesu Kreste. Mutu kaufela mwa Bible yana amuhezi Moya o Kenile, ataha ka nzila ya Mulimu, ona cwalo fela Mulimu mwa na li lukiselize. Ba eza nto yeswana. Nebana ni kutwisiso yeswana.

Lisupo zeswana ne li ba latelela. Misebezi yeswana ne i ba latelela. Kiñi? Neba pila ka Licwe. Ba ba ni Mezi aswana.

¹⁸⁰ Mi, kacenu, libaka lelu bezi ni lituto za litumelo hahulu in likopano, kakuli lukalisanga nto yenca. Ha lutokwi nto yenca. Lukute kwa mulaho!

¹⁸¹ Mushe na sa lukeli kunata Licwe lani hape, kukalisa sesinca. Na lukela kubulela kubona, kuama Licwe la makalelo. Oh, Ni sepa mwa lemuha zeo! Mushe na lukela kubulela fela za makalelo, Licwe le li natilwe; isiñi kulika ku Li nata hape, isiñi kulika kukalisa nto yenca, kono kubulela kwa Nto ya kale!

¹⁸² Mulimu, ni tuse! Haiba Ni shwa nili mubotana, fa katala, Ni ka bulela kwa Licwe la makalelo! Ni ka bulela za kutwisiso ya makalelo. Ni ka bulela Mañolo a makalelo ana ba file kolobezo ya Moya o Kenile, “Mubake, mañi ni mañi wa mina, mi mu kolobezwe ka Libizo la Jesu Kreste kwa swalelo ya libi, mi mu ka amuhela mpo ya Moya o Kenile.” Kubatani kwa kamita kwa Mezi ana latelela kuzwa mwa Licwe lani asali ni luna. Akatisa nto yeswana. Aka tisa lipono zeswana. Aka tisa lifoliso zeswana. Li ka tisa sipolofita. Si ka tisa lika kaufela ze ne tahile.

¹⁸³ Nako yeo Isilaele ha to yema ka Mañolo hape, ni kukutela hande mwa nzila, ne ba silezi mwa naha ya sepiso. Kono za ba tanda myaha ye mashumi amane.

¹⁸⁴ Pentekota se ba bile ka myaha ye mashumi amane kamba aketalizoho, kuyambaela fela mwa lihalaupa. Mukutele kwa Licwe! La iponahaza. Ki ze fa, liñozwi hande ka Linzwi. Moya o Kenile uteni mo ine ueza lika zeswana za Na ezize, konakuli Mezi Afumanwa kamita ateni moo. Taha fela ukutele ku Lona, kutela ku za kale, za makalelo. Nelili cwani kwa simuluho?

¹⁸⁵ “Kihande, ne ba swalani mwa mazoho ni mukutazi”? Hakuna nto yecwalo. “Ne ba kolobelizwe ka libizo la ‘Ndate, Mwana, Moya o Kenile’”? Hakuna nto ye cwalo. Hakuna batu mwa Bibe, kai ni kai, kamba (kwande a myaha ye myanda yemilalu) kwande a Bibe, yakile a kolobezwa ka libizo la “Ndate, Mwana, Moya o Kenile.” Yeo ki tuto yaba Katolika, isiñi tuto ya Bibe. Mwabona?

¹⁸⁶ Nebana ni Moya o Kenile. Lisupo ze li ka latelela baba lumela. Li ka eza cwalo hape kacenu. Licwe lani li sa pila fela sina kamita, Licwe le li natilwe lani!

¹⁸⁷ Lusike lwa bulela kuli, “Kihande, cwale mutahe kwanu mu to ikopanya kwa keleke ya Pentekota, kena mwa libaka za Mapentekota.” “Batili, taha u to ikopanya kuba Baptist, kamba ba Methodist, kamba Presbyterian, kamba Katolika.” Ki sikamañi seo? Kunata Licwe kwani kukutela fateni hape, kulika kukalisa nto yenca.

¹⁸⁸ Kuba bulelela kuli, “Mubake, ni ku kolobezwa ka Libizo la Jesu Kreste,” kwa swalelo ya libi za bona, “mi lisupo ze li ka ba

latelela ba balumela.” Cwale mu kutezi mwa nzila, ku kutela kwa Mezi aswana. Ki Mezi aswana aka kufa kukatuluha. Aka kufa kalimelo yeswana mwa mubili. Lika kufa mata aswana a kenisa. Lika kufa mata aswana a foliso. Lika eza nto yeswana yene li ba ezelize, haiba lukona fela kukutela kwa Moya.

¹⁸⁹ Bupilo bwa mwa mutai wa magilepu. Haiba nekubile cwalo ñohola, lika tisa nto yeswana muno mwaha. Woo kona mulao wa Mulimu. Mulao wa Mulimu u cwalo, haiba wo ki mutai wa magilepu, zwa kwateni, uka tahisa magilepu. Wakona ku si swalisisa hande ni sesili mwahali fela, kono cwale lisiye fela mi li ka taha hande kutaha kwa magilepu aswana hape.

¹⁹⁰ Kacwalo ni sibupiwa sa mwahali ki keleke ya Bupentekota, ni Likolobezo, ni Bumethodist, ni Bupresbyterian, ni—ni Buanglican, ni mifuta yeñwi kaufela ya milao yeo. Kiñi ha u sa li tuheli fela? Kukutela kwa Mutai wa luli, li ka taha kwa Mata a swana. Amen! Amen! Na lata cwalo.

¹⁹¹ “Kukalisa sesiñwi se si nca.” Nto yeswana ye luezize. Isiñi fela kulika kubonisa bundume bwaluna. “Dkota wa *Kuli-ni-kuli* ki mukalisi wa *Kuli-ni-kuli* yomutuna wa keleke ya *Kuli-ni-kuli*.” Zeo ne si cwalo.

¹⁹² Kona za ba bulezi Mushe, “Ni ka mi bonisa se Ni kona kueza. Ni ka litisa, kupale kumane!” Ha Li nata, ne li si ka taha. A huwa hape, “Kubonisa se Ni kona kueza!” Mulimu amufa mulatu ka sani.

¹⁹³ Kikuli hamu boni, haiba ukona “fela ku kumalela kopano.” Mulimu uka ku tusa ka seo. Yeo luli ki niti. U swanela ku kutela ku za makalelo. Kukuta kuzona.

¹⁹⁴ Kubulela fela kwa batu. (Usike wa ba bulelela kuli, “Taha u ikopanye kwa keleke yaluna. Utahe ubulele tuto ya tumelo ye.”) “Kutela kwa kubaka, mi ukolobezwe ka Libizo la Jesu Kreste, kwa swalelo ya libi za hao; mi mu ka amuhela mpo ya Moya o Kenile, haiba pilu ya hao i lukile. Mi lisupo ze li ka latelela balumeli. Sikwata sa balumeli, lisupo ze li ka ya ni bona.” Kakuli kiñi? Ki Licwe, Licwe le li natilwe ni Mezi a Hae a Bupilo ataha cwalo, kutahisa lika zeswana za Na ezize kwani. Halikoni fela kushutana. Oh, eni.

¹⁹⁵ Lu bata ku ikuhumusa, ni kubulela kuli, “Lu ba Methodist, ni ba Baptist.”

¹⁹⁶ Bulela fela kwa Licwe, Yena una ni Pata ya hae kamita. Usike wa lika ku ikenya ku Zona. Ni bile “kuikenya” kulo kwani. Usike walika ku I kopanya. Haukoni ku ikopanya ku Se, yeo kinto iliñwi. Wakona ku ikopanya kwa Methodist, wakona ku ikopanya kuba Baptist, wakona ku ikopanya kuba Pentekota, wakona ku ikopanya kuba Anglican, kono haukoni ku ikopanya ku Se. Batili. U lukela kutaha ku ikopanya ku Se. Usike wa ikopanya ku Sona; fela utazwe ka Sona. Ku felile. Li tezi ka sikamañi? U tazwe ka Mata, utazwe ka Moya, utazwe ka

Bupilo, utazwe ka tabo, kozo, pilutelele, musa, bunde, Mata a Moya o Kenile mwa bupilo bwa hao, kwa Kubateni kwa kamita kokuliteni. Muhupule.

Ni ka lukela ku kwala kakuli nako seifela.

¹⁹⁷ Kono, muhupule, Licwe lani ne li sa ba siyi. Ne li si ka ba siya. Mi Kreste hana ku lu siya; Kreste naize, “Ni kaba ni mina kamita, mane kuisa kwa mafelelezoa lifasi.” Kana ku cwalo? Mi Licwe lani lainelela ni bona nzila yani kaufela kuzwa kwa Horebe kuliba kwa Nebo. Nekulibile cwalo. Kuyo fita ni kwa Jordani, Ne li sali kwani. O Mulimu, Ni bata ku Li bona kwa Jordani!

¹⁹⁸ Mushe, hana li kwa Jordani, Licwe nelili ni yena mwa nzila kaufela. Mi na yemi fani, inza talima fafasi a—a sikwata sa batu ba ba wile mwa tumelo ni kuba kwahule ni Mulimu. Pilu ya hae ne i ba lilela. Mi atalima mwabuse bwa Jordani. Nali kwani kwa Jordani. Jordani, wa moya, ye Ni ambola fateni. Mi ki yani na yemi kwani, lifu ne li taha bukaufi. Kono a talima, alobezi fani kwatuko a hae mi kwani nekuyemi Licwe lani. Ataha fela fabuse bwa Licwe, mi Mangeloi ataha, amu lwala.

¹⁹⁹ “Hanina ku miyaya kamba ku misiya.” Hakuna taba kamba linako likaba cwani, kamba lu ka supala cwani, mufuta o lushwa kaufela ka ona, muhupule, Licwe likaba teni kwa Jordani kwani. Halina kusiya kamba ku luyaya. Muhupule fela cwalo. Mezi afumanwa mwa Licwe nako Kaufela akaba ni luna mwa bupilo kaufela, mane neba kupunya kwa Jordani.

²⁰⁰ Ha lu inamiseñi litho zaluna. [Muzwale mwa kopano ufa liñusa la bupulofita—Mu.]

²⁰¹ Moya wani wani ha usweli kuzamaya cwalo mwahala luna, Moya wa Mulimu uzamaya mwahala luna, kana kuna ni babañwi bani kakusasana wo babasa mu zibi Kreste, mi ha u—ha u yo fahaufi ni Licwe lani, ha ki ka kubulela ku Lona kakusasana cwana? Kono u ziba kuli Liteni. Mutalime ku Lona kai ni kai, ku Mu bona inza zamaya, ku Li bona hanze lizamaya mwahala sicaba. Ao kona Mezi afumanwa nako Kaufela. Yeo ki puluso. Wo ki Moya o zamaisa mwa likomoki zabona kutaha mwa sibaka kufitela ba palelwa kukuza mane, sesiñwi si ezahalile. Mi ha u Mu zibi, kikuli utabela kunanula lizho la hao ni kubulela kuli, “Ni lapelele kwateni, Muzwale Branham. Na fa cwale nibata ku Mu ziba. Mi Ni bata kubulela ni Yena, mi Ni bata ku Mu ziba ka mutalelela wa Moya wa Hae. Ni bata kuziba kuli uinzi nina fakaufi, ka nako kaufela. Ni lumela kuli Uteni. Kono Ni bata kubulela ka swanelo ya kubulela. Mi Ni nyolezwi, mi Ni nyolezwi za Mulimu. Ni bata ku Mu ziba hande”?

²⁰² Mulimu ami fuyole, sha. Hape Mulimu aku fuyole, sha. Ni wena, muzwale. Wena, ehe, kwa mulaho kafoo. Kulo koo, kalibe, eeni. Eeni, kalibe. Lwa bona mazoho amina, ni Mulimu wa a bona. Mulimu aku fuyole, mutangana tuwe. Mulimu aku fuyole.

Ni wena, kalibe. Amen. Mulimu aku fuyole. Aku fuyole, kezeli. Yomuñwi hape cwale, mwa nako ya kukuza. Mulimu ami fuyole kwa mulaho kafoo, mitangana ba sanana.

²⁰³ Munahane fateni. Munahane fateni, Kubateni kwa Mezi afumanwa mwa Licwe, ona Moya o swana wani; ha Na huwile kwani zazi la katulo lani ku Yena, ha Na ngile katulo yaluna. Mi mulamu wa Mulimu wa buhali wa Mu nata, mi libi za hao za tatezwa mwa mulamu wani, ni ku Mu nata, mi Mali a Hae ni mezi a poomoka kuzwa ku Yena. Ki hali, “Ndate, Nibeya Moya wa Ka mwa mazoho a Hao.” Mi ka Lizazi la Pentekota, Wa taha ku to zamaya ni luna mwa musipili. Mi se uli fakaufi hahulu cwale.

²⁰⁴ Ha no zwezi kwande, ni kuba kwahule ni Munzi; wali, “Mulena, Na taha kwa Hae.” Hanze lu opela cwana, haiba u tabela kutaha kwa aletare ni ku to kupa swalelo, hape, ka moyo wa hao, ku Krete? Amen.

Ni yambaezi kwahule ni Mulimu, (kukeluha
mwa nzila)

Cwale Na taha kwa hae;

Nzila ya ku sa lumela (sibi ki ku sa lumela) Ni
zamaile kuyona nako yetelele,

Mulena, Na taha kwa hae.

Nataha kwa hae, nataha kwa hae,

Nikamuta hakuna kuyambaela;

Kwalula hahulu mazoho a Hao a lilato,

Cwale, Mulena Na taha kwa hae.

²⁰⁵ [Muzwale Branham uzwelapili ku ñuñuna kuli, *Mulena, Na Taha Kwa Hae*—Mu.]

²⁰⁶ Bashimani babanyinyani babalalu bataha, kapili ka kuakufa, miyoko mwa meto a bona, ba kubama kwa tuko ni aletare. Kakuli, ba swalezwi. Ba swalezwi kale mane ba si ka nanuha mwa lipula zabona, foo mihupulo yabona ha i fetulwa fela. Na taha fela kwapili mi ba to kubama fa, kuli batu bazibe cwalo, kwa neku ko ba fumaneha, kakusasana cwana.

²⁰⁷ Ni nahana kuli kuna ni babañwi baba hulile baba tabela kueza cwalo, baba tabela fela kukubama, ni kubulela kuli, “Mulena, Ni—Ni yambaezi kwahule ni nzila. Ni bile hahulu ni kukakanya, mi fokuñwi Ni yambaezi mane ni kukena mwa sibi. Cwale Ni—Ni bata kukuta nako isika fela kale. Mulimu, Ni—Ni tabela kutaha. Ni ka tabela fela kutaha ni ku kubama fafasi.” Amen.

²⁰⁸ Cwale, basizana babanyinyani babalalu ba Arthur Beam, babata kulikanelela mane, batile kwanu, ba kubami fafasi.

²⁰⁹ Yataha kwanu ki musizana yomunyinyani yana ni fela munyana hae wa mushimani yomunyimnyani kwa lapa. Zazi leli leliñwi Ne ni inzi fela; musala Bo. Wood ataha mi ani bulelela kuli, abulela kuli kezeli yo na ya kwa sipatela ku yo ba ni

mbututu. Moya o Kenile wali, “Zamaya u ba bulelele kuli ukaba mushimani.” Ha yo pepwa, neli mushimani.

²¹⁰ Kubonahala kuli ki banana fela kakusasana cwana, banana ba bazwa mwa sitopa sa Kezeli Arnold, bato ipa bupilo bwabona. Aletare kaufela, kwa silyo saka, itezi fela banana.

²¹¹ Ikaba hande haiba lukona kuopela pina nyaan, aletare, kwa batu babañwi kaufela, (nji cwani?) babahule.

Cwale, Mulena, Na kuta kwa hae.

Na taha kwa hae. . . ? . . .

Nikamuta hakuna kuyambaela;
Kwalula hahulu mazoho a Hao a lilato,
Cwale, Mulena, Na taha kwa hae.

²¹² Ha lu inamiseñi litho zaluna fa nako nyana, kwa tapelo, kulapelela banana baa.

²¹³ Ndate yakwa Lihalimu, haiba kuna ni kuba kamuso, haiba Jesu uka liyeha ka myaha yetatama ye lishumi kamba lishumi ni ye ketalizoho, ba ikaba bashimani ni basizana baba ka lwala Liñusa hamoho cwalo ni masika amañwi ana ni kutaha. Hakuna kukakanya mwa munahano waka, Mulena, kono ki seo mazazi a bupilo bwabona kaufela akana ahupula kutaha kwa aletare yee. Mi ki tucwe nyana twa butokwa, Mulena. Lipilu zabona zenyinyani mi ze bunolo li nyazizwe kakusasana cwana. Mane kusina niheba kuteeleza Liñusa kaufela; kona ba sa zwa fela mwa muzuzu, neba teezeza ku Kezeli Arnold yana ba kutaza; bataha kwanu kwa aletare, bafa bupilo bwa bona bo buninyabni ku Wena.

²¹⁴ Cwale, Ndate, kona Ni feza fela kubulela kuli ku luna kupila Moya o Kenile. Mi ona Moya o Kenile wo, tumelo ni Moya, kona ye eza lika kaufela. Mi Ni lumela kuli yona hola luli ye, U swalele sibi kaufela se ba ezize. Mi Na Ku kupa, ka tumelo kaufela yeli mwa pilu yaka, kuli U buluke bupilo bwabona bobunyinyani mwahala musipili. Basike bakeluhela kwahule ni Nzila.

²¹⁵ Ye luli ki nto yenca. Moya ubulezi kakusasana cwana, kuli luka “bona sesiñwi sesinca.” Mulimu, haiba Utuhezi kusebelisana ni babañwi, ikungele bana babanyinyani. Kuli kakusasana cwana, mwa lipizo zakutaha kwa pili, hakuna neba yomuhulu alimuñwi, kono sikwata kaufela ki sa banana fela babatile kwanu. Ibo, ibile Liñusa lelituna lelitokwa kutwisiso yehulile, neba ku baba huhile, kono banana basweli Moya wa Lona. Lwa itumela ku Wena ka bona, Ndate. Ni ba fa ku Wena, kakuba mutanga Hao, kuba lituwelo za mukopano woo; kakuli, lu hupula kuli Kubateni kwa Mezi a Bupilo aka buba ni bona haibile fela ba sa pila. Mi hababe ni tumelo cwale ku ze ezahalile, zeo Mulimu aba hohezi fa lipula zabona ni ku ba luma fani, mi hababe ni tumelo ku Mulimu ka mazazi a bupilo bwa bona kaufela. Mi mioya yabona zenyinyani itiswe ku Wena ka lizazi la

lifu la bona; u yo kutela mwa mubili wa bona ka zazi la zuho. Ki ba Hao, Ndate. Lu bafa ku Wena ka Libizo la Jesu.

²¹⁶ Litoho zaluna ha li sa inami cwalo. Ni ka kupa kuli bana ba kaufela kwa katala, baba lumela kuli Jesu ki Mupulusi wa bona mi Yena Ya mi bulelezi, kwa mulaho koo mwa sicaba, kutaha kwanu ni kukubama kwa aletare. Mi kana mulumela kuli Jesu wa mi lata ni kuswalela libi za mina? Ni bata kuli mina kaufela muyeme ka mahutu ni kutalima kwa mulaho kwa sicaba. Se, kona mo kona kubulelela sicaba kuli wa lumela kuli Jesu ukupilisize. Cwale amuyeme ka mahutu, yeo ki niti, ni kutalima kwa sicaba. Mina bashimani babanyinyinani kaufela ni basizana baba lata Jesu, amu yeme ni kutalima kwa kopano kwani, kaufela mina.

²¹⁷ Kucwani mina basizana babanyinyani kwanu kwa pata? Mwa lumena nji? Mwa mu lata Jesu nji? Basizana babanyinyani ba kwanu, kikuli mulata Jesu ka lipilu zamina kaufela? Mwa lumela nji? Mwa Mu lata nji? Wa Mu lata, mulatiwa? Yema ona fa, kuli sicaba si zibe kuli ulata Jesu. Mulimu ami fuyole.

²¹⁸ Cwale ha lu fetuheñi neku *le* ni kuopelela batu ba lusika zwa kale, “Jesu wa ni lata! Na ziba cwalo. Bibekele ini bulelela cwalo.” Mwabona? Ha lu nanuleñi fela mazoho aluna hanze lu opela cwale. Ku lukile, ha lu i opeleñi.

Jesu wa ni lata! Na ziba cwalo,
Kakuli Bibekele i ni bulelela ona cwalo;
Banana ki ba Hao,
Ba fokola . . .

²¹⁹ Cwale ka mazoho a mina ananuhile, ki ba bakai mo baba bata—bata kuba kwani?

Ee, Jesu, wa ni lata,
Ee, Jesu wa ni lata,
Ee, Jesu wa ni lata,
Bibekele i ni bulelela ona cwalo.

²²⁰ Cwale kaufela mina mukutele ze ni bulela: [Bana kwa katala bakutela za bulela Muzwale Branham—Mu.] Na lumela Jesu Krete ki Mwana Mulimu. Kacenu Na Mu amuhela kuba Mupulusi waka. Kuzwa zazi le, kuya kwapili, Ni ka Mu lata Ni ku Mu sebeleza. Amen.

²²¹ [Muzwale mwa kopano uli, “Muzwale Branham, Nina ni bana babane mwa pilu yakaka nako ye. Nakupa shangwe u ba lapelele kwateni?”—Mu.] Luli nika lapela, Muzwale Ben.

²²² Ndate yakwa Lihalimu, muuna yo ubona kuli kuna ni bana babañwi babata ku Krete, mi wa huwa, sina mushemi, bakeñisa bana ba hae babanyinyani. Mi Moya otisize bana babanyinyani ba kwa aletare, ona Moya oswana wani u ba pilise banana ba, Mulena. Lumeleza cwalo. Lu ba fa ku Wena, Ndate, ka Libizo la Jesu Krete.

223 Cwale sina mina balikani hamunze mukutela kwa lipula za mina, Ni bata kuli mañi ni mañi neku leo muswale mwa mazoho ni bana ba, kamba ku ba nata nata fa mukokoto habanze baya cwalo. Kaufela mina a mukutele kwa lipula zamina, neku *le*. Mi mañi ni mañi neku leo anate nate banana ba mikokoto. Mi lwa mi lata ka lipilu zaluna kaufela. Mu liemba za Mubili wa Kreste, ka buñata fela ku Zona sina buñata bwaluna.

Lu ya kwa Sione,
Bunde, kwa bunde Sione;
Lu zamaya kuya kwa Sione,
Ona Munzi omunde wa Mulimu.

Mutahe, luna babalata Mulena,
Mi tabo ya luna izibahale,
Luopele hamoho pina yemunati,
Luopele hamoho pina yemunati,
Mi lupotolohe lubona,
Mi lupotolohe . . .

Ko ki kuopela kokunde luli! Ha lu nanuleñi mazoho aluna cwale.

Lu ya kwa Sione,
Bunde, kwa bunde Sione;
Lu zamaya kuya kwa Sione,
Ona Munzi omunde wa Mulimu.

Ha lu swalaneñi fela mwa mazoho ni yomuñwi halunze luopela cwale.

Lu ya kwa Sione,
Bunde, kwa bunde Sione;
Lu zamaya kuya kwa Sione,
Ona Munzi omunde wa Mulimu.

224 Cwale halu yemeñi ni litho zaluna liinzi, halunze lu . . . Ilize Muzwale Teddy, fela ki . . . [Muzwale Branham ukala kuñuñuna yetwi, *Lu Ya Kwa Sione*—Mu.]

225 Nina ni likupo zeñwi fa, ni litaulo ni zeñwi cwalo. Hakulata likona kuzwa kwabuse bwa mawate. Billy na ni bulelela kuli bana ni tukatulo nyana twa mbututu kuzwa kwa England, to tu kuma fa *cwana*, mwana yani ki sihole. Mi cwale ne lu swanela kulapelela zeo, hape.

226 Mi kacwalo . . . [Mwa kopano, Muzwale Ben uli, “Muzwale Branham, shangwe ni swalele ka ku lyananisa nyana, kono lapela kuli, yana punkile mota yaluna maabani busihu, kwa neku la silyo kwa pata, lapela kuli azibahale. Lapela kuli Mulena ali patulule.”—Mu.] Amen, Muzwale Ben, Ni ka eza cwalo luli.

227 [Muzwale Branham uzwelapili kuñuñusa, *Lu Ya Kwa Sione*—Mu.]

228 Halunze lu zamaya cwalo, Mulena, lu ziba kuli Licwe le li natilwe lani liteni ona mwahala luna, Mezi afumanwa nako

Kaufela azwa mwa Licwe aya kwa Keleke. O Mulimu wa Kamita, lu tamululele, kakusasana cwana, tumelo ku Mulimu yo yali ni luna. Ni ziba kuli Uka eza cwalo, haibile fela lukona kufumana kushemubiwa ki Wena, kuli Ukone ku lu sepa ka Sona. Haiba Uka lufa Ona ku luna mwa buñata, lwakona ku Asinya sinya, Mulena. Kono haiba lu fumani sishemo ku Wena, ha li ezahale.

²²⁹ Muzwale waluna ubulezi kuli yomuñwi na punkile mota ya hae. O Mulimu, luziba muuna yo haana mashelefi akueza lika ze. Ni lapela kuli Utise mutu yani aikutwe maswabi, kamba sesiñwi, abakele taba yee, atahe, abulele kuli, “Muzwale, Ni ka lukisa mota ya hao, Kina yana i punkile.” Tusa Muzwale Ben ni balatiwa ba hae.

²³⁰ Fa mwa mazoho aka kuna ni litaulo ni likupo, zena ni tumelo ku Mulimu yani. Mushe nana ni tumelo ku Mulimu yani, mi asila liwate. Daniele nana ni tumelo ku Mulimu yani, mi azwiswa mwa musima wa litau. Shadreki, Misheki, ni Abedinego, nebana ni tumelo ku Yena, mane ba tima mulilo. Paulusi nana ni tumelo ku Yena, mi zazi leliñwi lisebelezo ne li tiile luli mi Paulusi na sa koni kufita kwa batu kaufela, nangile fela kataulo, mi ali, “Ni lumela kuli Mulimu una ni na.” Abeya mazoho a hae fa litaulo ni masila, mi mioya yemaswe yazwa kwa sicaba, mi matuku ni makulano azwa ku bona. Mi, Mulimu, Nina ni tumelo ku Mulimu yaswana. Mi bumaswe ha bu zwe. Matuku, makulano, matata, ha li zwe, Mulena.

²³¹ Wena u Mulimu yaswana yana bulezi ku na kwani mwa Siita sa Mulilo, kwani kwa nuka. Ki Wena yana ni siswaniso sa Hao se si lepelela fani ni na, fa limota. Uina ni lunam Mulena. Wena uteni kamita, ona Siita sa Mulilo sesiswana sani. Mi luikozi Mezi azwa mwa Licwe zazi ni zazi, halunze lu ikopanya mwa Moya. Mi, Wena uteni mo. Luna ni sepo ku Wena, Mulena. Luna ni tumelo ku Wena. Lu lumela kuli Uka lu toza ni ku lutusa. Isiñi kwa kanya ya luna, Mulena; lukona kuba inge Mushe kanti, ha lu fosize. Lubata kueza sika sa kutusa Wena, Mulena. Yeo kona takazo ya pilu zaluna, kutusa Wena, haiba lukona kueza cwalo. Lu bonise, Ndate, kaufela Zo bata kuli lueze.

²³² Mi cwale, ka likezo za tumelo, Ni kalimela matuku a yemelwa ki litaulo ze, ni likupo zee. Lisiye sicaba. Ni ziba kuli Uka eza cwalo, Mulena. Na lumela cwalo, mwa pilu yaka, kuli Uka eza ona cwalo. Folisa matuku kaufela mwahala luna kakusasana cwana.

²³³ Pilisa bona baba nanuzi mazoho abona, baba bulezi kuli batabela kutaha kwa Licwe, kwa Mezi. Mulimu, hababe ni linyolwa hahulu kacenu, hakube ni lizwai hahulu mwa bupilo bwa bona, kufitela liba tiseza ku nyolelwa Kreste. Lumeleza cwalo.

²³⁴ Ba ni luna busihu boo, Ndate. O Mulimu, nikonise kulemuha, ka zona likupo ze, sesili fa lipilu za sicaba. Haiba hakuna zeli

mwa lipilu za bona, Mulena, Uni fe sesiñwi se ni ka kutaza kwa lipilu zabona busihu boo.

²³⁵ Fuyola Muzwale waluna Neville, ni musala hae, lubasi lwa hae; keleke yaluna yenyinyani, basepahali baluna, madikoni baluna, mamembala baluna. Ni Mubili wa Hao kai ni kai, ba ni luna, Ndate. Lu beya ze mwa mazoho a Hao, ka Libizo la Jesu Kreste.

Sione; lu ya kwa kuliba kwa Sione,
Munzi omunde wa Mulimu.

Cwale ha lu iopeleñi fela, hande, luli ku Yena cwale.
Mwabona?

Mutahe, luna ba balata Mulena,
Mi tabo ya luna izibahale,
Luopele hamoho pina yemunati,
Luopele hamoho pina yemunati,
Mi lu potolohe lubona,
Mi cwalo lu umbe lubona.

Ka lipilu zaluna ze inami cwale.

Lu ya kwa Sione,
Bunde, kwa bunde Sione;
Lu zamaya kuya kwa Sione,
Ki Munzi omunde wa Mulimu.



MEZI AMWA LICWE AFUMANWA NAKO KAUFELA LOZ61-0723M
(The Ever-Present Water From The Rock)

Liñusa le ka Muzwale William Marrion Branham, neli kotalizwe lwa pili mwa Sikuwa la Sunda kakusasana, Sikulu 23, 1961 ili fa Branham Tabernacle mwa Jeffersonville, Indiana, U.S.A., iingilwe kuzwa fa tepu ya magesi ya manzwi ni ku hatisiwa kusina kuzusa sika mwa teni kuya Sikuwa. Toloko ye ya mwa Silozi nei hatizizwe ni ku hasanyiwa kiba Voice Of God Recordings.

LOZI

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitususwe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangeli ya Jesu Krete. Buka ye hailekisiwi, kuatiswa mwa buńata, ku nepelwa fa moya wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org